



11329

1c. 8. 1p. 229

#

Hall

(Josephs)



DE LA 803363

TRANQVILLITE.
DE L'ESPRIT,



DE

IOSEPH HALL.

DE LA

TRADUCTION DE MONSIEUR

CHEVREAU.



A P A R I S,

Chez MICHEL BOBIN, au troi-
sième Pilier de la Grande Salle du
Palais, à l'Esperance.

M. C D. L X.


Avec Privilege du Roy.

THE UNIVERSITY OF CHICAGO
LIBRARY

1891-1892
JAN 15 1892

THE UNIVERSITY OF CHICAGO
LIBRARY
JAN 15 1892

THE UNIVERSITY OF CHICAGO
LIBRARY
JAN 15 1892



A

MONSIEVR

MONSIEVR

DE BEAUMONT

ABBE' DE SABLONCEAU,
Conseiller du Roy en ses
Conseils , & Precepteur
de sa Majesté.



MONSIEVR,

*Je serois orgueilleux de mes
baillons comme le Cynique , si*

aij

EPISTRE.

ie tirois quelque vanité de cét
ouvrage ; puis qu'il tient peut-
estre de moy toutes ses bassesses ;
& que l'Originale est tel , qu'on
en peut dire , ce qu'un des plus
grands Docteurs de l'Eglise a
dit autresfois du Livre de Iob,
que chaque mot y portoit son
sens , & chaque expression son
Mystere. Mais comme il est
des beautez qui n'ont pas be-
soin d'estre parées pour se faire
aymer , & des matieres pre-
cieuses dont l'art ne peut rele-
uer le prix , j'ay creu que les
paroles ne vous toucheroient

EPISTRE.

passant que les choses, que la Philosophie deuoit estre icy beaucoup plus graue, qu'aui-
stée, & que c'estoit faire tort à la Maiesté de cette Reyne, que de l'habiller en Coquette. En effect, il n'est pas de ce discours, comme de ces contrées qui sont fecondes en toutes sortes de fleurs, & par tout steriles en fruit: Il y a plus à s'y nourrir, qu'à s'y plaire, & ie ne me suis point mis en peine d'y ioindre la delicateffe du langage à la force du raisonnement, pource que ses graces
ā iiij

EPISTRE.

naturelles ne veulent point
estre redoublables aux estrange-
res, & qu'il n'est rien en fin de
plus eloquent au monde, que la
verité. C'est par ses maximes,
que les passions ne sont dans
l'homme, que comme des esclaves
dans une galere, que la
raison est leur maistresse &
leur Souveraine, que le Sage
est dans chaque saison de sa vie
ce qu'est dans l'une de l'an-
née, ce fameux fleuve d'Egypte
qui demeure dans ses rives, lors
que tous les autres ont accou-
stumé de se dérober, & qu'il

EPISTRE

se peut dire égal à Dieu, selon
les Stoïques, pour estre tous-
iours égal à soy-mesme. Je ne
rougiray donc pas de vous of-
frir ce Traité, MONSIEUR,
puis qu'en luy ie vous offre les
premiers preceptes & le der-
nier but de la Theologie & de
la Morale, & qu'il ne ressem-
ble pas à ces couleurs qui per-
dent leur plus vif éclat à l'at-
touchement ou au iour; mais à
ces raretez, qui donnent de
l'admiration à mesure qu'on
les estudie, & qui sont mesme
recommandables par leur
à iiii

EPISTRE

vieillesse. Ce n'est pas d'aujourd'huy, que mon impatience & mes amis m'ont conseillé de vous approcher; il y a longtemps que cét honneur a fait mon ambition; & quand ie n'y serois point obligé par des raisons tres-particulieres, il y en a de publiques qui m'y engagent si estroitement, que mon silence ne pouuoit plus degenerer qu'en ingratitude. Vous vous estes rendu le protecteur d'une Ville qui m'a veu naistre; & comme tous les Citoyens y sont deuenus vos crea-

EPISTRE.

tures, & qu'on n'y connoist plus vostre Nom, que par celui de Pere de la Patrie, il n'estoit pas iuste que ie restasse muët au milieu d'un peuple qui n'ouvre la bouche que pour vous benir, & que j'entendisse du cabinet, ce que les autres font retentir par toutes les ruës. Mais comme les loüanges ne sont plus aussi que des lieux communs, dont on se sert également pour le vice & pour la vertu, & qu'on les employe avec autant d'indifferen-
ce, que cette mal-heureuse

EPISTRE.


femme , qui donnoit de l'en-
cens aux Images d'Homere &
de Pythagore , avec la mesme
deuotion qu'a celles de Iesus-
Christ & de saint Paul , ie
n'offenceray , MONSIEVR,
ny vostre modestie , ny vostre
merite , & ie ne passeray point
de nos debtes a vostre Gene-
rosité , du bienfait au bienfa-
cteur , & des remerciemens
aux Eloges. Puis que le Soleil
ne reserve pas toute sa lumiere
pour soy , & que vos bontez
se répandent avec une profu-
sion si large & si magnifique,

EPISTRE.

*i'espere que vous les estendrez
encore a mon aduantage & a
ma gloire, & que vous ne
trouuerez pas mauuais que ie
vous porte avec ma reconnois-
sance, le vœu solennel que ie
fais d'estre,*

MONSIEVR,

Vostre tres-humble & tres-
obeissant seruiteur,
CHEVREAU.



ADVERTISSEMENT.



OMME Socrate faisoit dépendre la félicité du repos de l'ame , vn Sophiste luy répondit de mauuaise grace, que sa beatitude estoit celle d'une pierre , ou d'une foughe ; mais comme Socrate eust entendu , qu'il l'establiroit dans le desir & dans la possession de plusieurs choses, il luy re-


procha plus viuement , si
ie ne me trompe , que la
sienne estoit celle d'un ga-
leux , qui se frotte & qui se
gratte sans aucune relasche.
Ce n'est pas , L E C T E U R ,
par le sentiment de ce Phi-
losophe , que ie te veux fai-
re valoir un bien , qui a esté
nommé le plus grand & le
dernier , par un Sage d'une
autre Secte. Les veritez pu-
bliques n'ont pas besoin
d'estre defenduës ; & si tu
n'es point ingrat , tu mad-
uouëras , qu'en te donnant

ce discours de la Tranquil-
lité de l'Esprit, ie te fais
peut-estre vn present de ce
que tu cherches. Je l'ay tra-
duit de M^{re} Ioseph Hall,
dont ie t'ay fait voir quel-
ques ouurages : & quoy
qu'il sorte d'un homme,
qui n'a bien souuent que des
imprecations contre nos Reli-
gieux & contre nos Papes,
il ne doit pourtant pas t'estre
suspect, si tu consideres,
que la mer a des perles
aussi-bien que du limon, que
la terre produit du baume

& de l'aconit , & que pour
reuenir à mon fujet, la mef-
me main qui a fait des fa-
crileges peut auffi faire des
aumofnes. Regarde donc
cette piece fans aucun fcru-
pule , fi tu n'es le plus
défiant & le plus opinia-
ftre de tes ennemis ; &
quand tu luy auras donné
deux ou trois heures de
ton loisir , peut-estre que
la matiere de ton admira-
tion deuiendra celle de ton
eftude , qu'en ce cas , tu
te verras en quelque forte

obligé de ton bon-heur
& de ton salut , à vn He-
retique.

DE LA



DE LA
TRANQVILLITE
DE L'ESPRIT.

CHAPITRE I.



PRES auoir leu avec
soin les Moralitez de
quelques Payens, de qui
la vie a esté assez belle
pour leur faire meriter le nom de
Sages ; j'aduoüe que ie me suis treu-
ué surpris d'enuie, & de pitié tout
ensemble. D'un costé ie regardois
en eux avec quelque sorte de ialou-
sie, la nature ingenieuse, & subtile
à consoler en apparence les plus

A

malades, à remettre les plus esgarrez, & à rassurer les plus timides; & de l'autre ie sentoies en moy vne compassion toute charitable, & toute iuste, quand ie voyois qu'au lieu de leur auoir fait rencontrer le vray repos, ils auoient employé leur diligence & leur industrie, à leur faire naistre dans l'ame, le trouble, le désordre, & l'inquietude. Ils peuuent estre comparez en ce poinct, à ces levriers qui sont bons du pied, mais qui pour n'auoir pas de nez qui réponde à leur vifesse, poursuient leur proye avec ardeur, & ne courent que pour se lasser. On ne scauroit offer aux Stoiques, la gloire d'auoir eu des coniectures fort delicates: Mais outre qu'ils se sont perdus avec toutes leurs esperances, ils ont encore perdu tous ceux de leur auditoire, & de leur suite, Si Seneque eut esté esclairé de cette lumiere spirituelle, de quels mi-

racles n'ût-il point esté capable ? Et quel Theologien eût esté assez hardy pour luy disputer en cette matiere , l'aduantage des Preceptes ? Mais tel qu'il a esté, on luy doit cette confession honorable, que iamais Payen n'a escrit avec plus de force, ny Philosophe avec plus de vray-semblance. Pour moy , i'aduouë franchement, que ie m'en contenterois pour mon Docteur , & pour mon Maistre, si la Nature nous pouuoit suffire avec ses regles: mais elle n'a iamais entrepris vne tasche si releuée, sans faire voir son orgueil & sa foiblesse : & c'est icy principalement qu'elle s'est tousiours montrée semblable à ces pauvres Empyriques , qui dans leurs tableaux font parade ordinairement de plusieurs cures belles, rares, & merueilleuses , & qui ne pouuant pas mesme soulager ceux qui les recherchent, tesmoignent enfin, qu'ils

ne ſçauent guerir qu'en peinture. En effect, ſi elle eût pû acheuer vn ſi grand deſſein, quelle occupation eût-elle laiſſé à la Grace? Quel priuilege obtiendrait-on icy bas d'eſtre Chreſtien, puis que ce que nous cherchons, eſt le plus noble ouurage de l'ame, & l'eſtabliſſement d'un Paradis ſur la terre? C'eſt icy la borne, le but, & le prix de tous les ſouhaits des hommes, qu'on n'a pas pluſtoſt obtenus qu'on commence à viure, & à connoiſtre ſenſiblement, que la vie ne peut plus eſtre appellée vne miſere. Il ne faut donc pas treuuer eſtrange, que les Payens ayent donné la mailleure partie de leur temps & de leur eſtude, à la recherche d'un ſi grand bien; que pluſieurs en ayent eſcrit, & qu'aucun n'ait pû le toucher, puis que ce n'eſt pas dans Athenes, mais dans Ieruſalem, que nous deuons choiſir les hautes lumieres, qui nous y doiuent cōduire.

CHAPITRE II.

LA Grace n'est pas toutefois honteuse d'apprendre quelque chose de la Nature, comme Moysé ne dedaigne point de recevoir conseil d'un Madianite. La Nature a tousiours esté plus heureuse à voir la fin, que le chemin d'y paruenir; & quoy qu'elle ait discouru long-temps, ou de la Tranquillité de l'Esprit, ou de la Beatitude, elle a sans doute esté plus sçauante à toucher leur definition generale, que les moyens d'y pouuoir atteindre. C'est pour cette raison qu'elle nous enseigne, qu'il est du repos de l'ame, comme d'une eau tousiours tranquille; & que comme les bassins d'une balance ne s'esleuent, ny ne s'abaissent, mais pendét avec une mesme égalité: l'esprit ne doit point aussi ny trop s'élever dans une bõne fortune, ny trop

s'abaisser dans vne mauuaise : mais demeurer ferme entre l'vne & l'autre, & laisser à l'homme cette liberté precieuse, de pouuoir par tout iouyr de soy-mesme. Ce n'est pas qu'il soit dans la puissance du plus adroit, de se rendre si absolument maistre de ses passions, qu'il ne se resioüisse trop quelquefois au milieu de ses disgraces, & qu'il ne mesle de la tristesse avec sa ioye : Les poids les plus égaux mis d'abord dans la balance, panchent d'un costé & d'autre avec quelque inégalité apparente, & s'affermissent apres quelque agitation legere. Il suffit de mesme que l'esprit reuienne à soy, apres quelque trouble; & qu'il regarde le repos, comme s'il faisoit vne partie de son essence. C'est ce temperamment qui doit establir de necessité, le calme dont nous parlons, non pas seulement par des espreuues simples & vaines : mais par

ce qui le doit faire durer aussi long-temps que la vie. Il n'y a point aussi de cœur tellement serré de maux, où la consolation ne puisse treuver quelque place ; & le plus mal-heureux a quelque relasche dans sa misere, pource que la cause ne luy en est pas quelquefois cōnue, ou pource qu'il s'attend que la coustume & le temps l'y rendront peut. estre insensible. En effet , comme les balances les plus inégales dans leurs branles, ne laissent pas d'auoir bien souuent leur contrepoids, les plus dereglez se treuuent dans quelque sorte d'égalité : mais on ne les y voit point demeurer , & le mesme moment qui les y fait entrer , les en fait sortir. Si le frenetique donne quelque preuue de sa rage dans vne saison, il ne passera pas moins pour insensé , quoy qu'il semble sage dans vne autre. Il faut donc que l'esprit soit arresté dans vn repos qui conti-

nuë, & qu'il ne soit pas ferme simplement, quand il n'a rien deuant luy qui soit capable de l'ébranler, mais qu'il fasse voir, qu'il n'est jamais moins ébranlé, que quand on le veut abatre.

CHAPITRE III.

C'Est ce qui nous fait voir de bien pres, la folie de ceux qui ont crû treuver cette tranquillité dans vn estat si assuré de toutes les choses de dehors, qu'on n'en pût tirer aucun déplaisir, puis qu'elles changent avec le temps, & que celles qui semblent estre les mieux affermies, n'ont rien de constant, comme on dit, que leur inconstance. Quelques autres l'ont voulu faire dependre d'une disposition de l'ame si bien réglée par la Sagesse, qu'elle ne pust pas estre seulement émeuë de la pluspart des accidets qui com-

posent la frayeur & le desespoir: Mais comme le changement est de l'ordre de la Nature, leur recherche n'est pas moins ridicule, que vaine, puis que l'ame est tantost hardie, enioüée, & complaisante, & tantost abatuë, triste, & farouche. Par ces deux fondemens, sur qui les Sages les plus acheuez ont estably le vray repos, il ne nous est pas malaisé de iuger; qu'ils ne l'ont veu que de loing, qu'ils l'ont considéré avec admiration, avec soin, & avec ardeur; mais qu'ils n'ont eu pour y paruenir, que des desirs inutiles, & des connoissances imparfaites. Après cette verité, il est croyable que tous les remedes qu'ils ordonnent contre le trouble, sont impuissans, & qu'ils s'offrent à nous conduire dans vne route, où ils sont tousiours les premiers à s'égarer, & à se perdre. En effet, quelle regle est celle-cy, qu'après vn long embarras d'es-

prit, qui se lasse enfin de soy mesme, & de ce qu'il fait, & qui forme autāt de souhaits que de pensées, nous acheuions nos iours dans la solitude; Que nous fassions de nostre naturel vn commerce, & de nostre adresse vn choix d'amis; Et que nous soyōs si peu touchez de nos biens hereditaires, que nous les menagions plus pour l'usage que pour la montre, & plus pour les choses necessaires, que pour celles qui sont superflues? Pour les afflictions, la pluspart s'imaginent faire beaucoup, quand ils considerent qu'elles s'adoucissent à mesure qu'elles continuent, que les plus belles choses sont des chaines, & des fardeaux qui nous attachent & qui nous accablent, & que la consolation n'est iamais gueres éloignée des plus mauuaises. Mais il faut negliger ces regles qui sont affectées aux ames foibles, & passer à celles de la Philosophie Morale, qui

font l'estude, & l'exercice des Sages. Que sert-il premierement de s'estimer suiet à faillir? D'auoir de la preuoyance pour les euenemens douteux? De n'auoir point d'occupation qui ne soit aduantageuse? De ne se point mesler de l'Estat? De ne point rechercher de condition, ny d'employ? De rire de la vanité d'autrui? De ne point dépendre d'une opinion estrangere? De n'estre point hypocrite par curiosité, ny par interest? Oude nous aymer, iusques à nous resioüir dans la diuersité des viandes, & des autres voluptez des sens, hors l'yurognerie, qui ne peut estre, à mon aduis, ny prescrite par vn Philosophe, ny recherchée par vn homme qui aura de l'amour, & du respect pour la Vertu? Toutes ces choses sont fort agreables dans leur espece, & ne sont pas mesme inutiles: mais elles ne peuvent pas aller iusques à la fin, pour laquelle il sem-

ble qu'elles ayent esté ordonnées. La Nature nous donne bien ces leçons communes, mais non pas les moyens de toucher le but qu'elle nous propose, & nous n'en serions pas moins esloignez, quand nous mettrions tous ces enseignements en vſage; pource que les plus grâds ennemis de nostre paix nous sont cachez, ou que ceux qui nous sont découverts, ne peuvent estre si bien preuenus, qu'on s'en puisse promettre la victoire, & que ceux qui osent deffier toutes sortes d'accidents avec ces preceptes, ressemblent à ces gens d'escrime qui se tiennent toujours sur leur garde, & qui touchent de quelque coup extraordinaire, se treuvent enfin battus avecque leurs regles. Pour les malheurs qui nous sont connus, il est certain que l'Esprit se rend ordinairement à leurs attaques. Il y a des afflictions supportables, pource qu'elles sont le-

geres; & que comme ces croissans sur l'eau, elles disparoissent à mesure qu'elles se forment, & qu'elles s'estendent. Il y en a de plus fortes qui esbranlent les murailles de la maison, & qui ne la peuuent faire tomber sur nous : Il y en a qui se font de force vn passage au cœur, & qui rompent tout ce qui leur fait de la resistance; de violentes qui enleuent l'esprit hors de son assiette ordinaire, & d'autres furieuses & terribles à leur arriuée, & qui ne laissent iamais qu'une entiere desolation à leur sortie. Le plus sage & le plus resolu Philosophie de l'Antiquité, changea de couleur, & de posture, quand il se vid contraint d'aualer de la ciguë, & fit rire par sa frayeur ceux qui auoient regardé toutes ses premieres meditatiōs avec enuie. Le meilleur des Empereurs Payens, qui obtint le surnō de Pieus pour vn de ses titres, ne se lassoit point de

louer le courage des Chrestiens, qui n'auoient pas vn autre visage sur vn échaffaut que dans la prison, & qui pour montrer la verité de leur créance, paroissoient moins émeus, & moins estonnez, que les boureaux qui les déchiroient en pieces. Mais comme il faut de necessité, qu'une Puissance toute diuine rassure l'esprit contre la fureur de ces afflictions violentes; eleuons vn peu les yeux au dessus de nous, pour suplée à la Sagesse naturelle, pour voir les regles qui porteront la paix chez nous, quand tout le monde seroit accablé de la guerre, & des miseres qui l'accompagnent & qui la suivent; & pour establir le principe de nostre repos, allons au deuant de ce qui a coustume de l'attaquer, & de le destruire.

CHAPITRE IV.

DEux mortels ennemis de nostre Tranquillité se presente d'abord en teste , la conscience ou le souuenir du mal qu'on a fait, & la crainte de celuy qu'on doit souffrir. Celuy - là s'appelle proprement peché : dans le second nous comprenons les afflictions, ou les disgraces. Il faut necessairement retrancher de nous le premier, & moderer l'autre simplement, puis qu'il n'est pas possible que celuy-là soit en repos, qui est en querelle contre Dieu & contre soy-mesme, & que cette tranquillité soit vn don de Dieu, si elle peut subsister sans luy, & si elle est sa principale ennemie. C'est l'ouurage du peché, quoy qu'agréable d'abord : Il est comme vn bout-feu entre Dieu & l'homme, & entre l'homme & soy-mesme.

Mais comme cette hayne n'éclatte pas à tous moments , & que les plus opiniâtres ennemis ne sont pas à toute heure aux prises ; la conscience ne crie pas aussi toujours : Elle est quelquefois muette ; quelquefois elle murmure ; & dans la satisfaction qu'elle a de se plaindre de ses malheurs , elle a pourtant toujours en elle cette horreur , & cette inquiétude secrète qui ne luy peut accorder de trêve. Ce n'est pas que le coupable ne puisse auoir quelque relache : mais il est hors de pouuoir & d'esperance de iouir d'une paix parfaite. Considérez son visage , vous le verrez deffait & passé , vous treuuez ses ioyes fausses & contraintes , ses paroles obscures , ses résolutions incertaines ; & vous iugerez qu'en luy , le peché n'a point esté si doux dans ses premiers mouuements , qu'il est horrible & furieux en sa suite. C'est pour cette raison que ce malheureux tasche en

vain de s'éloigner des compagnies, & de soy-mesme, & que l'ame touchée d'un si vif ressentiment, imite ces pauvres malades qui cherchent dans la diversité, leur rafraichissement & leur repos ; & qui dans un nombre infiny d'épreuues, ne peuvent enfin rencontrer pour eux, ny soulagement, ny remede. Neron apres tant de sang répandu, peut bien changer de liect, & de chambre, pour changer de condition : mais ses ennemis le suivent, quelque lieu qu'il choisisse pour s'en cacher, ils se campent deuant luy, & font vne partie de luy-mesme. Que sert-il de chercher quelque remede au dedás, quand on porte par tout son bourseau ? Il est aussi malaisé de s'éloigner de soy-mesme, que d'attendre quelque repos en cét estat. L'ame peut bien sortir du corps, mais il est impossible que la conscience ne tienne tousiours compagnie à l'ame, &

que le remords abandonne la conscience. Il est vray que dans ces douleurs ordinaires quelques vns se sont iettez de cét enfer particulier, dans vn abyfme de mort eternelle, semblables à ces poissons qui sautent de la poëlle au milieu des flammes; & qu'ils n'ont pas tât crainit les peines dont ils estoïët menasiez, que celles qui causoient desia leur desespoir & leurs plaintes. Mais n'est-ce pas ioindre vn second enfer, au premier qu'ils portoient dans leur propre sein? Quand les ennemis de dedans commencent à faire bruit, la conscience n'est occupée qu'à s'affliger: Mais il se rencontre des insenséz qui se portent au mal avec aussi peu de honte, que s'ils se portoient au bien, & dont l'endurcissement est tel, qu'il semble que le péché soit la plus aisée, & la plus ordinaire de leurs habitudes. Il y a des hommes, dont les goziers & les esto-

machs, s'il faut ainsi dire, sont capables d'aualer, & de digerer toutes sortes d'assassinats & de meurtres, sans auoir pitié d'eux, ny d'autrui, & qui des mesmes mains qu'ils ont ensanglantées apres le disner, en coupent au repas suiuant tous les bons morceaux qui peuuent assouuir leur gourmandise, ou contenter leur delicateffe. Quelque posture ferme qu'ils tiennent à table, & quelque bon visage qu'ils portent, il est croyable que le cœur leur saigne; & que de meurtriers, ils pourront bien estre deuenus encore hypocrites. Regardez ces vers qui brillent denuict, & qui par l'éclat qu'ils iettent, se feroient prendre pour des diamants qui roulent sur l'herbe, ou pour des Estoilles errantes en terre; vous admirerez en eux l'industrie & la beauté de la Nature, mais pour peu que vous presiez ces insectes estincellans, vous

n'y treuuez qu'une humidité froide & crüe. Il en est de mesme de ceux qui ne rougissent iamais de leurs fautes, & qui par une mauuaise honte, se persuadent qu'un remords est une bassesse, & que le repentir & la vaillance ne vont iamais de compagnie. Ils paroissent ioyeux dans les assemblées, & sont tristes dedans leur maison: Mais assurez-vous qu'ils se donnent la gese quand ils rient, que toutes leurs heures sont mauuaises, qu'ils n'obtiennent ny cōsolation de leur discours, ny repos de leur sommeil; & qu'au plus fort de leur assoupissement, le peché s'échape, qui leur rend tout horrible iusques à leurs songes. S'ils deuiennent stupides par coustume, comme il arriue que les enfans, à force d'estre chastiez, se rendent quelquefois insensibles à la verge, ils sentiront quelque coup estrange, qui leur tirera du sang du fond du cœur, &

qui pour venir de loing, leur en sera d'autant plus fascheux, & d'autant plus rude. Je puis dire à ces obstinez, ce qu'un hardy Tragique dit autrefois au grand Pompée; Pour ce que tu n'as connu l'affliction que trop tard, aprens que les souspirs & les larmes feront un iour le plus beau de tes exercices, que tu auras à combattre le desespoir, & que tu auras plus de sentiment pour la douleur, que tu n'as eu d'ambition pour la gloire. La conscience peut bien auoir quelque relâche par hazard, comme le feu peut estre en apparence estouffé par quelque masse de bois verd; mais quand il a desseiché son humidité, c'est alors que sa flamme tire sa plus grande force de la resistance qu'elle a treuüée. Veritablement ce sommeil ne scauroit estre durable, & la conscience crie aussi long-temps, que nous continuons à mal-faire. J'ay veu des

personnes qui se pressoit le nez, dans l'esperance d'arrester leur sang par ce moyē, qui ne laissoit pas de se faire vn passage par leur bouche, ou de descendre au fond de leur estomach. Nous ne sçaurions viure en repos, tant que nous auons des ennemis domestiques, & c'est vne necessité, qu'une tumeur enflammée nous fasse plaindre, tant que l'espine, ou la matiere corrompuë demeure au dedans à se pourrir. Le temps est quelquefois le remede, & le Medecin des maux de l'esprit: mais pour celuy-cy, c'est avec luy qu'il s'empire comme certaines maladies du corps, & qu'il croist tousiours avec l'âge.

CHAPITRE V.

IL n'est point de faix sans quelque reconciliation, & vous ne sçauriez estre bien avec vous-mes-

me, que vous ne le soyez auparavant avec Dieu : pource que vostre conscience, qui est vostre plus ferme suport, & vostre refuge le plus assuré quand elle ne peche point, ressemble au seruiteur fidele, qui ne s'interesse iamaïs que dans le party de son Maistre. Mais si vous pechez, elle ne peut vous souffrir, sans vous declarer vne guerre horrible & secrete; & pour se remettre avec vous, elle veut que vous vous remettiez avec son Iuge, & n'ose pas vous estre indulgente, iusques à manquer de fidelité à son Createur. Il n'est point de reconciliation sans Grace : Dieu ne peut oublier l'iniure qu'on luy a faite, & peut aussi peu cacher sa haine. C'est la coustume deceux à qui la Nature semble auoir fait le cœur double, de dissimuler leurs sentimens d'embrasser leurs ennemis, tant que l'occasion de leur nuire, ne leur est ny

assurée , ny facile ; & d'auoir des
soumissions pour eux , quand ils
n'ont pas la hardiesse de s'employer
à leur perte. Mais la toute-Puissance
n'est point capable de ces des-
tours ; elle commande à la ven-
geance , & frappe quand il luy plaist,
sans douter, & sans attendre. Il n'est
point de remission sans payement,
& Dieu ne fait pas pour nous, ce que
nous faisons bien souuent pour ceux
qui nous doiuent , avec qui nous
sommes obligez de composer par
charité, ou qui s'échappent de nos
poursuittes , par leur impuissance.
Tous les pechez sont autant de deb-
tes qui doiuent estre payées à Dieu.
C'est vne parole hardie, mais verita-
ble, & Dieu ne seroit pas iuste, s'il
nous remettoit vne debte , sans en
auoir esté satisfait. Le Peuple qui
dans son imagination prophane, fait
Dieu tout misericordieux, espere le
pardon sans aucun payement, &
dans

dans cette ignorance orgueilleuse, il desunit & diuise la misericorde, & la iustice de celuy en qui elles sont essentielles, & pense que l'une surpasse l'autre, où toutes deux sont infinies.

Osez - vous bien esperer que Dieu vous soit fauorable, iusques à se rendre quelque iniustice ? Il sera iuste, & vostre presumption sera la cause de vostre ruine. Il est certain que nous ne pouuons pas satisfaire de nous-mesmes ; comme la iustice est infinie, chaque peché merite vne punition infinie. Le meilleur de nos trauaux est finy, & defectueux : Ce que nous sommes obligez de faire, ne peut seruir de recompense pour ce que nous n'auons pas fait auparauant, & quand nous l'offrons à Dieu pour vne satisfaction entiere, nous ne sommes pas moins à plaindre que le voyageur, qui croit luy donner beaucoup, quand pour des choses bonnes & salutaires, il

luy présente des noyaux de Dattes.
Mais où trouuerons nous ce payement, qui doit estre d'un prix infiny, qu'en celuy-là seul qui est la toute puissance, dont la dignité a tellement fait valoir la satisfaction, que ce qu'il a souffert en peu de temps, est proportionné à ce que nous deuions souffrir au delà de tous les siècles ? Il a tout fait, tout souffert, & tout payé : Il a satisfait pour nous, & nous auons satisfait en luy. Par où commenceray-ie à te reuerer, diuin Entre-metteur de ma paix, Sauueur des hommes, Oinct de Dieu, Mediateur entre Dieu & l'homme, en qui rien ne se treuve qui ne soit au delà de nostre idée, & de l'admiration mesme des Anges, qui t'ont veu dans ton abaissement avec silence, & qui t'adorent, avec leurs Cantiques, dans ta gloire ? Tu estois de toy-mesme deuant tous les temps, comme Dieu, comme

Fils éternel du Pere éternel , sans être second en substance , en dignité , ny en nature ; engendré sans diminution de celuy qui t'a engendré , qui te communique entierement , ce qu'il retient aussi entierement en soy-mesme ; pource que vous estes tous deux infinis sans inégalité de nature , & sans diuision d'essence. Dans cette condition , l'amour infiny que tu auois pour nous , t'a dépouillé de ta gloire , & t'a reuestu de nostre misere ; & sans laisser d'estre Dieu comme tu estois , tu commenças d'estre ce que tu n'estois point , c'est à dire , Homme , afin que tu pûsses estre Mediateur parfait entre Dieu & l'homme , estant tous les deux dans vne seule personne , Dieu afin que tu pûsses payer , homme afin que tu pûsses souffrir , & que l'homme ayant peché contre Dieu , tu pûsses comme Dieu & homme , satisfaire à Dieu pour l'homme.

Tout autre que toy, qui es la Parole
eternelle, ne sçauroit penetrer dans
la profondeur de ce mystere, & ne
sçauroit comprendre, que Dieu se
soit fait homme, afin que l'homme
fust esleué au dessus des Cieux, que
celuy à qui toutes les Puissances
font hommage, dût venir dans les
parties basses de la terre, comme le
seruiteur de ses esclaves, & la ran-
çon de ses ennemis; qu'il ait pris
auec nostre nature nos peines & nos
foibleesses: qu'estant sans peché, il
ait voulu porter nos fautes; que ce-
luy que les Cieux ne sont pas capa-
bles de contenir, ait esté couché
dans vne paille, méprisé des hom-
mes, persecuté des tyrans, tenté des
Diables, trahy de son seruiteur, cru-
cifié dans la crainte entre deux lar-
rons, & comme abandonné pour
vn temps du Pere. O rançon qu'on
ne peut assez estimer! Toy qui es
le Conseiller eternal du Pere, l'A-

gneau égorgé deuant la fondation du Monde, tu es venu dans la plénitude des temps, pour estre immolé par l'homme, pour l'homme, & pour estre tout ensemble le sacrifice qui estoit offert, le Sacrificateur qui offroit, & le Dieu à qui il estoit présenté. Avec quelle douceur, comme Prophete, lors que tu estois sur la terre, nous as tu déclaré la paix, que tu nous as procurée par l'effusion de ton sang, comme Sacrificateur, & que tu nous conserues comme Roy qui regne là haut dans les Cieux? C'est par toy seul qu'elle nous a esté acquise, & c'est par toy seule qu'elle nous a esté donnée. N'est-ce pas vn pardon sans exemple & sans mesure, que Dieu se reconcilie avec l'homme, que l'innocent recherche le criminel, & que le Roy s'allie du rebelle? Nous ne sommes pas dignes que Dieu nous offre la paix à vne condition si aisée,

& qui porte avec elle vn si grand fruit; & comme il ne veut pas que nous en considerions le prix, mais que nous la receuions simplement de luy, certes il ne sçauroit ny moins demander, ny donner aussi d'auantage.

CHAPITRE VI.

LA paix que nous auons acquise, donc esté tout d'vn coup payée, mais il faut encore qu'elle soit confirmée en chaque ame, qui se ressent d'vn si grand bien-fait. Si nous n'auons point de main pour prédre ce que IESVS-CHRIST tient dans la sienne, ce qu'il nous offre, ne peut pas agir en nous avec beaucoup de vertu. Cette main spirituelle dont nous receuons ses graces, est la foy, qui est proprement vne ferme assurance que nous auons en celuy qui est nostre entre-metteur: Reçois la paix, dit-il, & sois heureux par ce moyen: Croy, & tu

as receu. C'est de là que nous sommes interressez en tout ce que Dieu nous a promis, & en tout ce qu'il a si heureusement accompli, que nous auons son amour, qui est le fondement de nostre gloire, que d'ennemis nous sommes ses veritables enfans, & que comme tels, nous passons de la protection que nous luy demandons en ce monde, à l'esperance d'un heritage dont la durée ne se mesure qu'à celle de l'eternité. Ce champ est si vaste & si large, qu'il n'est pas plus mal-aisé de s'y promener, que de s'y perdre : & quand ie donneroie tous mes iours & toutes mes nuits à le visiter, quelque chemin que i'eusse fait, il m'en resteroit encore beaucoup plus à faire. Je voudrois y auoir donné plus de temps, si mon dessein n'estoit de me louer plustost d'un bien si precieux & si rare, que de me mettre en peine des moyes de l'obtenir. Regardez main-

tenant apres de si longs voyages où la Colombe peut faire rencontre de cette oliue de paix : l'application de ce payement nous la procure , par ce payement nous obtenons grace , & par cette grace vne reconciliation qui est la source de toutes nos ioyes. S'il arriue donc que comme vn Sergent seuer , la conscience vienne vous saisir pour ce que vous deuez à IESVS-CHRIST , répondez hardiment qu'il est desia satisfait , apportez vostre quittance écrite & signée de son propre Sang , & reconnuë par vne vraye foy : c'est alors que le Sergent qui estoit prest de vous traifner, vous embrasse, & que vous faites vostre Aduocat de vostre partie. Cette paix est de telle importance, qu'elle reünit Dieu avec nous , & nous accorde avec nous-mesmes ; de sorte que qui n'en iouyt pas , ne peut auoir que de tres-mauuaises heures ; & quoy qu'il fasse

pour se diuertir, il porte à la table & au liçt, au foyer & à la campagne, tout ce qu'il craint, & tout ce qui le tyrannise, & souspire iusques au milieu des resioüyssances publiques. Quel diuertissement, qui merite nostre pitié! Quelle ioye qui nous demande des larmes! cours donc, mondain voluptueux, & ne manque pas de te laisser prendre aux amorces du peché qui te seduit, & qui te presse. Rend-toy, Sophiste, pour t'abuser dans ta propre cause, par quelque faux raisonnement: Fay tout ce que tu pourras, pour t'enseuelir dans le vin avec tes inquietudes; mais ne doute pas qu'elles ne te viennent treuuer deuant ton réveil, pour te monstrier ton Enfer, & que tu n'en sois accompagné de plus prés que de ton ombre. C'est ainsi que la Biche blessée mortellement d'un coup de flèche, fuyt en vain de tous costez, quoy qu'elle en ait pû rompre

une partie : comme le fer est demeuré dedans , elle court sans estre soulagée du mal qu'elle souffre , & sent encore que le temps l'augmente. Il en est de mesme du pecheur , dont la playe est d'autant plus dangereuse , qu'elle est moins connue , & qui , se proposant toutes sortes de plaisirs deuant ses yeux & dans son esprit , trouue enfin que rien n'est plus proche de luy que sa peine & son desespoir. Le peché luy doit encore vn nouveau coup , qu'il luy portera peut-estre , lors qu'il sera moins en estat de s'endurer : & tous ces commencemens ne sont que comme de simples éclairs qui menacent d'un horrible foudre. J'ay veu autresfois vn petit ruisseau qui couloit sans faire aucun bruit , & qui s'enfla si bien ; après s'estre arresté quelque temps , qu'il renuersa toutes les bornes qui luy auoient esté ordonnées de Part & de la nature.

Après auoir trop differé le soin de te repentir, le liét où tous les autres trouuent leur repos, sera ton horreur & ton supplice. Nous auons connu des malades, qui s'empuertoient épouuentablement contre de vieux pechez, sur qui mesme ils n'auoient pas fait auparauant de reflexion, & qui se desespéroient lors qu'ils auoient plus de suiet & plus de moyens de se consoler. Enfin, il n'est point d'autre regle que celle-cy, quoy qu'on puisse dire: Il faut que la conscience soit affligée ou satisfaite: déchargez-vous du fardeau qui vous accable, & croyez que celui qui ne prend rien à credit, ne peut estre interrompu ny troublé par le ressouuenir de ses debtes.

CHAPITRE VII.

POVR estre en possession d'une paix bien establie, il ne suffit pas d'auoir effacé nos vieux pechez, si nous ne donnons encore la chasse

aux nouveaux, & si nous n'employons nostre preuoyance contre ceux qui sont à venir, pource que la tentation est d'elle-mesme incommode, & qu'elle est la cause la plus sensible de nos déreglemens & de nos troubles. Le peché ne trouue iamaïs de prise en vn endroit, qu'il ne fasse de nouveaux efforts pour gagner tousiours plus auant: il s'attache où il se glise, & se rend le maître des places, quand on croit qu'il ne fait que les reconnoistre. Je ne suis, ny de l'humeur ny de l'opinion de ces ignorans ambitieux, qui regardent avec enuie, ceux dont les maisons semblent estre assiegées d'une foule de sollicitateurs, qui ont tousiours des requestes à leur presenter ou à leur faire dans leurs mains ou dans leur bouche; & suis beaucoup moins encore pour ces autres, qui traînent apres eux vne on gue suite de traistres, qui leur

offrent leurs mal-heureux seruites avec ardeur, & qui ne leur conseillans iamais que la perte de leur ennemy ou de leur riuai, ne les tirent de l'oisiueté, que pour les exercer apres à des meurtres. Il en est presque de mesme des tentations de l'ame, dont elle ne peut se défaire, tant qu'elle n'en examine pas la nature, qui ne se rebutent iamais moins que quand on les reiette avec quelque sorte de crainte. Ceux qui demandent, remettent quelquesfois leur attente sur vn refus à demy contraint, & s'imaginent que c'est accorder leur priere, que d'y contredire avec negligence. Les réponses promptes & hardies portent le peché au desespoir. Il est insolent quand il rencontre vne ame lasche & complaisante, & c'est vn miracle quand il ne la gagne point à force de l'importuner. Soyez donc tousiours plus opiniastre que luy, &

songez qu'il suffit de luy résister pour le vaincre. Pour y réussir, il faut que la Religion & la raison nous aydent à retenir ces passions violentes & déréglées, & qu'elles s'employent aussi à les moderer : autrement, il en seroit comme des chevaux à qui le chaste Hippolyte auoit trop lasché la bride, qui l'entraînerent par tout où il ne vouloit pas aller, & qui ne le laisserent, qu'après l'auoir mis en pieces; ou bien au contraire, comme de ces autres chevaux fougueux, qui pour estre retenus d'une main trop forte, ruent, se cabrent, & ne se mettent en action que pour ietter par terre, & pour frapper dangereusement celui qui auoit entrepris de les dompter. La sagesse Chrestienne n'éclate jamais plus qu'à gouverner ces mouuemens, qui ne sont pas plus nécessaires dans leur usage, qu'ils sont nuisibles dans leur mauuaise

conduitte. La raison n'a iamais esté plus empêchée qu'à leur commander; & quoy qu'elle ait trauaillé avec quelque fruiet sur ceux qui sont d'un temperament froid, il est pourtant vray que ceux qui ont esté d'une trempe beaucoup plus dure, ont oublié la verge dont leur ieu- nesse auoit esté arrestée, & qu'ils ont encore moins fait de cas de son industrie. Ce pouuoir est de la iurisdiction du Christianisme, qui nous regenere, & qui nous donne par ce moyen vn second estre; de sorte qu'il n'est pas plus naturel aux hommes d'estre sujets aux passions, qu'il l'est aux Chrestiens de les conduire & de les regler. La raison veut qu'on repete son Alphabet dans sa colere, afin que ce temps bannisse la fureur de celuy qu'elle possède, & vrayement il n'est pas croyable qu'une bile bien allumée s'entretienne en mesme estat apres le recit de tant de

lettres. Le Christianisme ne nous charge point la memoire de tant de preceptes ; mais il fait bien plus, pource qu'il nous met en possession de nous defendre de cette rage, qui ne peut estre si courte, qu'elle ne soit tousiours trop longue. I'admire la réponce que fit le dernier Cardinal de nostre Angleterre, à vn Astrologue qui auoit tiré curieusement son horoscope, & qui luy predisoit quelque chose de particulier & de grand : Peut-estre, dit-il, que ie suis né tel ; mais i'ay esté regeneré depuis, & ma seconde naissance a confondu ma premiere. La nature surprend infiniment ceux qui ne reconnoissent rien au dessus d'elle ; mais qu'un Chrestien renuoye son intemperance sur sa propre inclination, & qu'il ose dire : Je suis d'un temperament de soulfhre & de feu, ie suis né amoureux, ie suis né colere ; c'est vne excuse moins par-

donnable que la faute. De quel vantage peut donc estre la Religion, si elle ne surmonte la nature ? Nous ne sommes Chrestiens qu'en ce que nous nous gouvernons nous-mesmes ; tout le reste n'est qu'une belle & vaine idée. Le ressouvenir de nostre profession est mesme de telle vertu, qu'il nous arreste, & comme cette pierre precieuse qui est iettée dans la mer, il calme toutes ces tempestes de dedans, que les affections y font sousleuer à nostre perte & à nostre honte. L'esprit de l'homme qui n'est point regeneré, n'est point capable de cét effort : il est toujours dans les défiances & dans les combats : & pource qu'il n'est soutenu que de la nature, il est enfin contraint de se rendre, & d'aduoüer qu'asseürément ce n'est point par elle, qu'on se fait vn chemin à la victoire. Dans cét état il n'est point de remede ny d'esperance : mais l'ame

Chrestienne, s'emporte avec vne vigueur & avec vne moderation digne de son caractere; elle ne songe qu'à se rendre libre, & ne treuve pas plus de peine à vaincre ses ennemis, qu'à les attaquer. En effet, si nous n'appellons que la nature à nostre secours, elle ne peut pas nous defendre contre tant d'inquietudes: Dieu n'est pas prodigue, pour permettre que des sujets si ravallez participent à ses meilleures benedictions: & ce n'est pas à elle, mais au Chrestien, qu'est reserué l'appareil & l'honneur d'un si beau triomphe.

CHAPITRE VIII.

Jusques icy nous auons connu le plus secret & le plus cruel ennemy de nostre paix; & la raison nous a fait voir, qu'après l'auoir combattu, il ne nous restoit plus que la moitié du chemin à faire. Les affli-

Etions nous troublent , ou dans leur épreuue , ou dans leur attente. Quand elles surprennent vn esprit foible en cét état, elles ne manquent iamais de le renuerfer , & ne luy laissent pas seulement la connoissance qu'il doit auoir de luy-mesme. Il s'en est trouué , qui lassez d'vne maladie longue & lente , ont mieux aymé recourir à la cruauté , qu'aux remedes ; & qui pour se déliurer de leurs peines , ont esté leurs Medecins & leurs bourreaux tout ensemble. Il s'en est veu , qui pour n'estre pas si forts que la douleur dont ils estoient persecutez , sont tombez de l'impatience dans la folie ; & d'autres , qui pour des maux incurables , pour vn affront , ou pour vne perte de biens ou d'enfans , ont estimé si peu la vie , qu'ils ont fait de leur maison leur solitude , ou pour mieux dire , leur sepulchre. Il est certain , qu'vn remede se vendroit bien cher ,

44 *De la Tranquillité*

si la nature en auoit quelque vn contre les disgraces ; mais la terre ne peut qu'en vain s'opposer à ce que le Ciel nous enuoye : & quand elle en pourroit venir à bout, ce seroit estre tousiours miserable, que de n'estre pas suiet à quelque misere. L'esprit s'ennuyeroit dans vne felicité perpetuelle, il trouueroit son dégoust dans son abondance, & ne iugeroit pas bien de la douceur, s'il ne connoissoit aussi l'amertume. Laschez tout à fait la bride à vn cheual vif & ardent, vous verrez qu'il se lassera de luy-même. L'Esté, du consentement de tous les hommes, est la plus agreable, la plus riche & la plus parée des saisons; mais s'il n'estoit mélé de vents frais & de froides pluyes, il en seroit la plus incommode, & la plus à craindre. Il ne seroit pas Esté, s'il ne nous estoit amené de l'Hyuer, & s'il n'en estoit de bien présuiuy. Nous ne deuons-

donc pas coire, qu'il soit en nostre puissance, d'éviter toutes sortes d'afflictions : C'est beaucoup, si nous pouuons nous defendre de quelques-vnes. On doit laisser toutes celles qu'on peut fuyr & confondre, ou supporter les autres par la patience. C'est vne regle generale en cette matiere, qu'on ne doit point s'affliger soy-mesme, qu'il faut s'éloigner du mal autant qu'on peut, souffrir le reste, & tascher d'adoucir ce qui est capable de nous causer de la douleur & de la tristesse.

C H A P I T R E IX.

LA crainte est le fondement des afflictions ; & quoy qu'il y en ait de tres-legeres, elles sont pourtant tout ce que vous les faites dans vostre idée. Il s'en presente bien souuent, qui s'en forment sans aucune raison apparente, & qui trou-

uent insupportable, ce qui est purement imaginaire; & nous en voyons d'autres qui chantent au milieu de leurs tourmens, & qui arrachent des larmes de ceux qui ne font que les regarder: L'un reçoit vne playe mortelle, & la douleur qu'il souffre ne le fait pas mesme changer de couleur; & l'autre, après les nouvelles de plusieurs pertes, ne perd pas vn moment de son repos & de son sommeil, & ne paroist pas plus ému à ce recit, que Zenon le fut à celuy du naufrage de son nauire. Vn de nos Martyrs, Greenhan, se tient estendu sur vn banc, Se lie luy-mesme de plusieurs cordes, avec vne resolution inouïe, attend sans trembler, le rasoir qui luy ouure l'estomach, souffre sans se plaindre qu'on luy remuë ses entrailles, où d'autres fremissent d'horreur, & ne permettent, qu'après vne longue contestation, qu'on leur ouure seulement la

veine. Pour les afflictions qui dépendent de la fantaisie, on ne peut attendre de remède que de la sagesse, qui nous porte au mépris des accidens & des reuolutions du monde, & qui representant à nos esprits, comme vn miroir, les choses dans leur nature, nous desabuse de nos erreurs, & nous fait connoître que nous prenons souuent des chimeres pour de veritables monstres. Purgez vostre cerueau d'élebores, ne refusez point de prendre conseil, ouurez vostre oreille à vostre amy, & l'effet de ces afflictions ne durera pas plus en vous, que celui des songes.

CHAPITRE X.

IL y auroit de la vanité & de la folie à faire voir, par quels moyens nous pouuons nous empêcher de tomber dans les disgrâces. Nostre esprit, nostre prudence, & l'amour

propre que nous auons pour nous-mesmes, ne nous permettent point de sommeiller auprès d'elles. Puis que nostre vie est sujette à tant de malheurs, il est plus beau pour nous, d'apprendre à les supporter avec patience, qu'à les éuiter avec industrie. Il n'est presque pas croyable combien il est important d'estre resolu, pour les adoucir en tant de fascheuses rencontres. J'ay veu vn homme, qui leuoit avec vn petit instrument, vn poids, dont quarante personnes ne pouuoient venir à bout, avec toute leur adresse & toutes leurs forces. Nous sommes icy comme dans vn Ocean de miseres. où nous ne découurons point de terre ferme : vne vague roule sur l'autre, auparauant que la premiere ait finy sa course. Les calamitez arriuent en foule, comme si à faute de se haster elles deuoient perdre leur rang; & les meilleures choses
ne

ne viennent pas plustost à nous, que les plus mauuaises occupent leur place. Outre que nous auons vn nombre infiny de maux reels, si nous voulions reigler vn remede pour chacun en particulier, nous entreprendrions vn commentaire sur les remedes de Petrarque, comme Salmeron, & nous verrions enfin que la vie ne suffiroit, ny à l'acheuer ny à le lire.

C H A P I T R E X I.

CHaque maladie du corps a presque besoin d'un remede particulier; mais vne mesme Medecine peut suffire à toutes celles de l'ame, & l'on s'en peut seruir par la mesme raison que les maistres d'armes, donnent contre le premier venu, mesmes preceptes & mesmes leçons d'assaut, de defence & de posture. Le voudrois d'abord ordon-

C

ner la patience qui sçait vaincre toutes les disgraces, pource qu'elles meurent comme le Basilic, quand elles sont preuenuës, & que par cette resolution preuoyante nous les rendons moins capables de nous assaillir, ou que nous deuenons plus propres à leur opposer nostre resistance. A peine peut-on conceuoir iusques où la hardiesse peut monter. Ce Milord dont l'Espagne parle encore avec tant d'admiration, n'eust pû iamais surmonter vne beste furieuse, qui se mordoit elle-mesme pour s'animer dans sa rage, s'il ne l'eust attenduë avec aussi peu d'étonnement, que si les chaines l'eussent mise dans l'impuissance de luy nuire. Le peuple s'enfuyt, effrayé d'un jeu si peu attendu, & s'il fust arriué que ce grand homme en eust seulement destourné les yeux, où pouuoit estre sa retraite, son honneur ou sa recompense? Mais il de-

meura ferme auprès d'elle, il l'attendit sans la craindre, il en vint à bout contre l'opinion commune, & par cette action il se vit comblé de richesses & de gloire. Ce n'est pas que les mal-heurs puissent estre éloignez par la preuoyance; mais comme c'est par elle qu'ils perdent leur premiere force, ils en sont toujours plus aisez à supporter: S'ils ne viennent point, la peine est heureusement perduë, & s'ils viennent, elle est vtilement employée. Par quel principe nous assurerons-nous que les afflictions ne nous trouuerons iamais, si nous sommes assurez qu'elles nous peuuent mesme visiter en foule? Quand elles rencontrent vn esprit foible, il est certain qu'elles ne manquent point de l'abbattre, & de le ietter dans le desespoir, & qu'il n'est point de moyen plus seur, que de se les rendre tousiours presentes, pour leur

faire perdre la moitié de leur violence, à leur arriuée. Comme on s'exerce sur le plastron, pour s'acquiescer plus d'adresse contre vn ennemy, & qu'on apprend à se battre à l'épée avec de simples fleurets; nous deuons aussi nous preparer par la preuoyance contre tant d'ennemis domestiques, & les combattre si-bien de pensée, qu'il ne nous soit pas plus mal-aisé de les surmonter, que de les attendre. Maintenant la bonne chere, le sommeil & la santé m'entretiennent dans vn estat qui ne me permet pas de me plaindre: Vne maladie trauerse ma ioye, qui m'oste l'appetit & le repos, & qui me rend les heures aussi ennuyeuses & aussi lentes, que si le long iour d'Ezechias estoit reuenu pour me tourmenter. Si ie n'ay pas toutes les choses superflues, ie suis pour le moins en possession de celles qui sont necessaires; & cependant que

ie me contente & que ie me flatte, vne pauureté honteuse m'attaque dedans ma maison, me dérobe tout iusques à l'esperance, me renuoye à la garderobe d'un amy pour m'habiller, à la table d'un voisin pour viure; me donne la terre pour liect, & la fontaine pour caue. Ie me promeine sur mes heritages, où ie considere la beauté des plantes; i'admire ce qui me vient de mon industrie & de celle de mes peres, & dans ce moment, la Religion ou l'iniustice de quelque arrest, me bannissent de mon patrimoine & de mon pays, & me contraignent d'acheuer mes iours parmy des personnes inconnuës, de qui ie ne puis tirer, ny consolation ny remede. I'aduouë que ces accidens sont fascheux; mais la prosperité les merite, quand elle ne se forme pas quelquesfois ces sages soupçons; & si elle donne ses pensées à la possession du bien, sans en

auoir pour la preuoyance du mal, elle reſſemble à vne Ville qui eſt tous les iours en danger par ſon aſſiette, & qui ne s'employe qu'à meubler richement ſes cabinets & ſes chambres, ſans auoir le ſoin de faire ſeulement porter deux hottes de terre pour la deſence de ſes murailles. C'eſt par cette pareſſe que nos ennemis ſont faits plus heureux, & que nous deuenons plus miſerables. Il faut donc ſe faire vn tableau des calamitez à venir, & les regarder ſouuent pour n'en eſtre point accablé, ménager par aduance toutes ſes forces contr'elles, & les attendre comme ſi elles eſtoient inéuitables. Par cette meditation on ſe diſpoſe à leur venue : & ſ'il s'en trouue de vigoureux au fleuret, qui ſont laſches à l'épée, il eſt pourtant vray-ſemblable qu'on ne doit point eſtre plus hardy dans vn duel, que quand l'adreſſe eſt vn de nos plus vieilles habitudes.

C H A P I T R E X I I .

AN'en point mentir, on donne beaucoup moins de prise aux afflictions, quand on considere qu'elles partent d'une main diuine, dont la puissance est gouuernée par la sagesse, & retenuë par vn amour infiny. Les bestes les plus farouches endurent les coups de leurs maistres sans aucun bruit, & deuorent tout autre qui entreprend seulement de les menacer. Je sens maintenant que mon Createur me frappe, qu'elle raison puis-ie auoir de murmurer contre luy, ou contre moy-mesme? C'est estre insensé, que d'estre surpris d'un desordre, sans l'auoir preueu; & rebelle, qu'estre impatient dans vn mal qui nous est enuoyé de Dieu, qui seul le peut faire cesser comme il l'a fait naistre. Il faut donc que ie porte

mes blasphemes contre sa iustice & contre sa misericorde, dont mon impieté ne peut destourner le cours; ou que ie me console par la constance, qui ne peut estre contrainte sans faire connoistre ma folie & ma condition déplorable. Mais comme les impatiens ont d'ordinaire leurs excuses, ils veulent peut-estre qu'un imprudence teméraire, qu'un plat mal assaisonné, ou qu'un air grossier & corrompu, les ait reduit à ce malheureux estat: & font en cecy comme les chiens, qui mordent la pierre qui ne les pouvoit offencer, sans la main qui leur a iettée. Si ie vous blesse, qu'importe que ce soit de mon épée, de la vostre, ou de celle d'un estranger? Dieu punit les hommes par leurs mains propres, par la sienne, par celles des Anges; par l'épée d'un ennemy, par les elements, & par les bestes; & si nous ne voyons pas comment il conduit sa

vengeance par tant de moyens & par tant de ressorts differens, nous ne deuons nous en prendre qu'à la foiblesse de nostre veüe. Comment nous pouuons-nous plaindre de l'instrument, & ne pas reconnoistre celuy qui nous frappe? Le larron prest de rendre l'ame, pardonne à celuy qui va l'estrangler sur vn gibet, ou le rompre sur vne rouë, & remplir l'air de ces cris contre ses témoins & contre ses Iuges. Blasmez donc la premiere cause, ou n'accusez point des instrumens incapables de vous nuire, sans elle qui les ordonne & qui les choisit; & quoy qu'ils soient peut-estre iniustes en vous affligeant, vos fautes vous doiuent assez persuader, qu'ils ne laissent pas de vous persecuter avec iustice.

C H A P I T R E X I I I .

LA patience ne suffit pourtant pas dans les trauerses, si elle n'est accompagnée d'actions de graces. C'en'est pas assez de se contenter des choses bonnes : les afflictions que l'ignorance prend pour des maux, sont enuoyées de la bonté mesme, en faueur de ceux qui les souffrent : & l'on ne peut oster à Dieu, ny son intention ny sa fin. S'il n'est point de bien comparable à celuy qui rend la santé, nous deuons benir les accidens qui sont les derniers remedes d'un esprit malade. Vostre ame est incommodée; & pource que vous ne vous sentez pas de cette indisposition, vous deuez croire qu'elle en est d'autant plus cruelle & plus dangereuse. Vous estes peut-estre trauaillé d'un orgueil qui vous tyrannise, d'une hypocrisie qui vous perd,

d'une auarice qui vous deuore, d'une inconstance qui vous lasse, d'une luxure qui vous brusle, d'une enuie qui vous consomme, d'une oisiveté qui vous assoupit, ou d'une colere qui approche de la rage. C'est presque vn miracle de voir vn esprit, sans quelque maladie mortelle. Si les trauerses qui en sont les vrayes remedes, ne sont pas assez plaisantes, il faut songer, si vous ne faites plus de cas de vostre palais que de vostre ame, que ce sont des medecines; qu'elles sont belles, pourueu qu'elles soient vtilles; qu'elles ne se font pas valoir par leur goust, mais par leur vertu; & qu'elles vous seront agreables, mesme en vous déplaisant, si c'est par elles que vous deuez acheter vostre guerison. Dans le premier accès d'une maladie du corps, vous auallez vn breuuage, quoy que vostre estomach l'abhore pour son amertume; & quand

60. *De la tranquillité*

vous en auez reconnu l'effet, vous loüiez avec plaisir celuy qui vous l'a ordonné, vous le remerciez avec estude, & vous le recompensez avec vsure. Cependant, le Medecin spirituel qui voit l'incommodité de vostre ame, est touché de compassion, auparavant que vous ayez pitié de vous-mesme; il vous rend visite, sans en estre sollicité; il vous enuoye vn remede plus salutaire qu'agreable; & bien loing de le recevoir, vous ne le reconnoissez que par vostre ingratitude & par vos iniures. Apres auoir considéré la meilleure ou la moindre partie qui est en nous, il faut s'aymer bien peu, pour preferer la mort à la peine, & pour auoir plus de peur d'un remede difficile, que d'une maladie volontaire. Nous sommes aueugles & fols dans l'estime de nostre bien propre, & nous choisissons plustost les choses par leur superficie, que par

leur nature. Comme nous auons de l'amour pour les delectables, & de l'auersion pour les vtils, celuy qui fonde le cœur & les abysses, reprend & corrige nostre folie, éloigne nos vains souhaits de nostre pensée, nous contraint, s'il faut ainsi dire, de prendre le bien que nous refusons, & nous treuve enfin sans recōnoissance. L'enfant a beau crier apres vn cousteau qui iettera de la lueur, ou bien apres quelque pilule dorée; le pere sçait qu'il demande ce qui luy peut nuire, & ne l'accorde, ny à ses cris ny à ses larmes. Dans cét estat, l'enfant prend ce refus pour vne rigueur trop seuerre; mais quand la raison luy est venuë avec l'aage, il s'estonne de sa sottise, & benit celuy dont il auoit creu deuoir se plaindre. Puis que l'ame est la plus haute & la plus noble partie de nous-mesmes, que le corps en est la moindre aussi-bien.

que nostre condition, nous ne devons point murmurer de ce qui les touche : la perte des biens , des amis & de la santé, nous est quelquesfois aduantageuse, & ne nous seruiroit pas peu, quand'elle ne seruiroit que de matiere à nostre vertu.

CHAPITRE XIV.

CE n'est pas encore assez d'estre satisfaits & reconnoissans, si nous ne sommes ioyeux dans les accidens qui nous arriuent, & si du sentiment que nous auons de la douleur, nous ne passons à la connoissance de sa fin, quoy qu'à bien parler, cette meditation soit aussi difficile. qu'elle est necessaire, & qu'elle ait besoin d'un esprit ferme & d'un grand courage. Il n'est point d'oiseau qui ne chante dans un Ciel serein, ou dans le Printemps; & celuy-cy doit estre le plus estimé de

tous, à mon aduis, qui continuë son chant dans l'Hyver & dans les pluyes. Ceux de la Se^cte d'Epicure peuuent bien auoir des chansons dans le bal & dans le festin; mais il n'est permis qu'aux compagnons de Daniel, de faire esclatter leurs Cantiques dans vne fournaise ardente, qu'à Paul & à Silas d'estre libres dans les fers, & aux Martyrs, de se resiouyr dans la mort mesme. Cette ioye qui nous vient purement du Ciel, est engendrée dans vn Chrestien, par l'assurance qu'il a de treuuer son aduantage dans sa peine, d'en tirer vn heureux succès comme vn fruit de sa iustice, & d'obtenir vne Couronne pour le prix de son combat. Ce n'est donc pas connoistre le Ciel, que d'employer moins de temps à se réjouyr de sa gloire qui est prochaine, qu'à s'affliger de sa misere, qui n'a que quelques momens pour sa durée.

C H A P I T R E X V.

CETTE meditation est de telle force, qu'elle s'oppose toujours avec succès à la crainte, & au sentiment de la mort, qui de tous les maux en est le dernier & le plus terrible. C'est cette aveugle impitoyable, qui méprise toutes les règles humaines, qui conduisent à la tranquillité de l'esprit, & qui portant la terreur dans l'ame du plus resolu, & le trouble dans celle du plus résolu; fait voir qu'on ne peut enfin se défendre de sa tyrannie, quoy qu'on employe les chansons impudiques du dissolu Anacreon, ou qu'avec la prophane Lucrece, on s'arme contre elle de la confiance d'Epicure. Voyez Belsazar, environné des sacrez vaisseaux de Jerusalem, des Reynes ses concubines, & de tous les Grands de sa Cour;

considerez-le au milieu de son yvrongnerie, & ne refusez pas d'entendre avec quelles loüanges il reuerse ses Dieux de bois & de fonte.

A peine croiriez-vous qu'un courage si releué peust estre si-tost abbatu, & que la tristesse & l'effroy deussent acheuer un festin si celebre & si magnifique. Attendez seulement vne heure, vous remarquerez que son visage coloré comme son vin, est deuenu palle & défait; que sa main superbe qui déffoit Dieu si souuent, tremble comme la fueille d'un arbre, qui est enuelpée d'un tourbillon; & que ses genoux robustes, qui n'auoient pû succomber encore sous le faix d'un corps si pesant, ne peuuent, ny le porter, ny le soustenir. Si vous en demandez la raison, c'est que la mort le fait adjourner deuant elle par vne lettre, & qu'elle se sert de deux Eunuques, pour luy oster ce

qu'il a d'orgueil & de vie. Où sont maintenant ces regards si estudiez, ces morceaux si delicats, ces rencontres si agreables, & tout ce que la volupté pouuoit fournir à son goust, à ses yeux & à ses oreilles ? Où sont les triumphes éclattans de cette Cour, où les moindres repas estoient autant de festins, & tous les iours autant de festes ? On void ses Courtisans, qui s'estonnent comme luy, d'un changement si peu attendu : la frayeur du Roy passe en eux par vne espece de contagion nouvelle : Pas vn ne le diuertit, & pas vn ne le console. C'est ainsi que la mort estend son Empire dans les esprits de ceux qui ne sont attachez qu'aux choses du monde : Elle ne se contente pas d'augmenter leurs maux par l'attente de la peine qui les menace, elle y adioute encore, pour les desesperer, la cause de leur ioye passée. Ce monstre de tous les Em.

pereurs Romains, qui ne se diuertissoit que d'assassinats & de meurtres, & qui ne treuuoit point de couleur plus belle, que celle du sang qu'il faisoit répandre, fut si confus & si troublé dans ce départ, qu'il parut dans sa mort beaucoup plus lasche & beaucoup plus foible, qu'il n'auoit esté cruel dans les plus honteuses années de sa vie.

C H A P I T R E X V I.

IL se voit des hommes, à qui la separation de l'ame & du corps fait tant de peur, qu'ils se soucient moins d'estre morts, que de mourir : & sans vne crainte si iuste & si nécessaire, que Dieu a donnée à la nature pour bride, on n'eust veu que des Architophels & des Catons, des Cleopatres & des Lucreces, & l'exécution des meilleures loix eust esté presque tousiours preuenüe par la

mort volontaire des coupables & des mal-heureux. L'ame qui est dans le corps sans aucun plaisir, pour le moins sensible, n'en peut mesme sortir qu'avec vne peine extrême, qui change avec les instrumens, & la maniere de cette separation épouventable. Dans celle qui est violente, elle fait voir principalement cette horreur secrette, qui ne sçauroit estre évitée par aucune adresse, & qui demande toute nostre constance pour la supporter. Si les maladies qui vont à la mort comme à leur fin, sont accompagnées de tant de douleurs & de tant de plaintes, que fera-ce de leur fin mesme ? Car comme les indispositions sont les maladies du corps, la mort est aussi la plus grande & la dernière des maladies. Il s'en voit d'autres, qui ne craignent pas tant de mourir que d'estre morts, quand ils se persuadent, que leur souffran-

ce est au delà de leurs forces, quoy qu'elle s'en aille avec la mesme vî-
tesse qu'elle est venue. Quelques-
vns, pour s'estre imaginez qu'on
n'auoit pas besoin de consolation
avec les morts, n'ont point appre-
hendé ce passage; & l'un des bons
Empereurs Payens s'en plaignoit en
quelque sorte dans son liét funeste,
comme s'il eust voulu instruire la
posterité de ses doutes, & des re-
grets où cette condition le deuoit
reduire. Le Mondain que décrit
Platon, déplore ainsi la misere du se-
pulchre, outre ses calamitez & ses
peines: Faut-il, mal-heureux que
je suis, qu'on m'enseuelisse tout
seul, pour pourrir dans les entrailles
de la terre, pour estre la proye des
vers, pour ne rien voir au dessus de
moy, & pourn'estre veu de personne!
La nature se fait vne horreur de ce
qui n'est plus, quand la mort n'au-
roit rien de plus horrible ny de plus

estrange. Il est bien mal-aisé que ceux qui n'esperent aucun pardon, ne s'en fassent vn portrait épouuenable, apres auoir appris qu'elle est beaucoup moins à craindre, pource qu'elle est le terme de cette vie, que pource qu'elle est le commencement d'une autre, dont les tourmens n'ont ny fin ny tréue. S'il y a tant de peine à mourir vne seule fois, il y en doit bien auoir dauantage à mourir tousiours; & si l'on s'afflige de se voir couper vn membre, on souffre bien plus, quand le corps entier est à la gehenne avec l'ame qui le fait plaindre, & qui est le principe de sa vie. Si les hommes ont inuenté des supplices avec vn art tout nouveau & tout effroyable, on en doit bien attendre d'autres des esprits beaucoup plus subtils, & dont la cruauté semble faire vne partie de leur employ & de leur essence. Si nos douleurs, quoy que courtes &

passageres, nous sont si longues & si fascheuses, que doiuent faire les eternelles? Et si les afflictions qui arriuent aux Eleus, sont si grandes, qu'elles les portent presque au desespoir, que doiuent estre celles qui sont reseruées aux personnes qui sont en execration deuant Dieu? Cette intelligence n'appartient qu'à ceux qui ont esté quelque peu touchés des flammes d'Enfer, ou qui ont entendu les gemissemens desesperer de quelque mal-heureux Apostat. C'est la ruse ordinaire de l'ennemy commun de nostre salut, de nous cacher cette horreur; & pource que nous luy sommes tousjours suspects, & que nous auons du temps à l'éuiter, quand il nous en reste à la craindre, il fait tout ce qui luy est possible, pour nous en donner tout ensemble, & le sentiment & la veüe.

CHAPITRE XVII.

QVAND ce monstre qui ne s'entretient que de la desolation de la nature, commence à paroître, qu'il s'approche avec son équipage effroyable, & que les plus temeraires & les plus robustes, perdent le cœur & la force à sa venue, le vray Chrestien, dans l'assurance qu'il a de sa beatitude prochaine, l'attend, le combat, & le fourmoute. Il est impossible de le vaincre sans mourir; mais c'est estre heureux dans sa victoire, que de mourir sans estre frappé d'un si puissant ennemy, & de triompher au milieu de la mort mesme. Il n'est point de separation plus douce, que celle qui destache l'ame d'avec le corps, pour les réunir à Dieu. Si toute nostre vie n'est qu'une mort continuée, on ne peut assez estimer la mort, qui est le ter-
me

me & la fin de cette vie importune,
& le commencement d'une autre,
dont les felicitez sont eternelles. Le
libertin craint la mort, pource qu'il
craint d'estre mal-heureux : le dé-
fiant n'ose y songer, pource qu'ils ap-
prehende d'estre encore plus mise-
rable, ou de n'estre plus rien du
tout : Il n'y a que le vray Chrestien
qui l'attende, & qui la recoive avec
joye, comme celle qui le doit con-
duire où il veut aller. C'est par elle
qu'il voit le Ciel à demy ouuert,
qu'il y élève les mains & l'esprit;
qu'il le demande comme un bien
qu'on luy a promis, & qu'il le consi-
dere comme son dernier heritage.
Pour le posseder, il a fait son mépris
& son horreur des souhaits & des
passions des autres. Les richesses ne
luy ont pas esté seulement indiffe-
rentes, elles luy ont mesme esté
suspectes : la volupté n'a pû le ten-
ter ny le corrompre : il se tient heu-

reux de changer de condition par la douleur & par la mort ; & quand l'Enfer se rencontreroit entre luy & cét aymable séjour, il trauerseroit ce chemin avec vn plaisir digne de son courage & de son attente. Si Cleombrote, apres auoir leu ce que Platon auoit écrit de l'immortalité de l'ame, eut bien la hardiesse de se precipiter d'un rocher, pour en faire plus tost l'épreuue, que ne deurions-nous point faire, nous qui sommes certains, qu'outre l'immortalité, nous iouïrons encore d'une gloire qu'on ne peut comprendre ? Il nous seroit honteux de manquer de resolution dans vne rencontre, où ce disciple de l'ancienne Academie a donné de si fortes preuues de la sienne ; & qu'estans fondez sur des connoissances hautes, & sur des veritez sensibles, nous fussions plus lasches que luy, qui pour toute assurance n'auoit que l'opinion de son Maistre, &

qui ne se porta point à cette action, par aucun mépris de la vie. Ces derniers temps mesme nous ont donné vn Italien, qui pour imiter les anciens Romains, & pour ressusciter leur resolution & leur vertu en sa personne, s'écrioit à haute voix d'un visage ferme, dans la violence de la gehenne & des douleurs qu'on luy faisoit endurer, pour auoir massacré vn Tyran : Ma mort est sensible, ma renommée doit estre immortelle. Ces paroles ne ressentent pas tant le Christianisme, que la vieille Rome : La consolation est vaine, qui ne fait pas voir qu'on peut suruiure à sa renommée ; & ce n'est pas estre heureux, que d'auoir vn bien, dont on ne peut esperer ny la possession ny la veüe. Mais si cette attente l'a comblé de ioye au milieu de ses tourmens, que ne deuons-nous point faire pour la gloire qui nous est promise, & dont la durée est égale à

celle de Dieu ? Celuy qui a les yeux de saint Estienne, quand il regarde le Ciel, doit auoir le mesme sentiment, la mesme impatience & le mesme zele; & n'en treuve le chemin, ny plus rude ny plus difficile que luy. Mais s'il le considere d'une autre sorte, qu'il proteste que la mort n'est pas si horrible, qu'on la represente, ou qu'il soustienne que la crainte qu'il en peut auoir, ne diminuë rien de son repos, assurez-vous qu'il est le plus miserable ou le plus dissimulé de tous les hommes.

C H A P I T R E X V I I I .

Voilà les ennemis du costé gauche; le droit a les siens, qui sont beaucoup plus malaisez à decouvrir, pource que leurs coups sont plus agreables, qu'il nous chatouillent en nous blessant, & qu'ils nous tuent quand ils nous caressent. La

gourmandise en fait plus mourir, que la famine : & comme tous excès est contraire à la santé, il est aussi contraire au repos de l'ame. Ceux qui desirent beaucoup, ne sont pas moins pauvres que ceux qui n'ont rien ; & l'yvrongne est aussi alteré, que celuy qui suë sous le faix d'un pesant fardeau. C'est delà que viennent les impatiences, les ialousies, les frayeurs, les esperances, les souhaits, les afflictions, les soucis, les entreprises, les soupçons, & tant d'autres déreglemens, dont le moindre est capable de troubler toute nostre vie. L'un, sans regarder ce qu'il a, iette les yeux sur ce qu'il n'a pas, & sur ce qu'il ne sçauroit auoir ; & deuiet malade de voir la Nature plus fertile ailleurs, que dans son champ & dans son iardin : L'autre ieufne, & languit au milieu de ses richesses, pour les laisser à quelque estourdy, ou, ce qui ne vaut gueres.

micux, à quelque prodigue. Celuy-cy defesperé d'une bonne année, devient son bourreau par son avarice, & se pend de regret luy-mesme, lors que le peuple porte par tout ses réjouiſſances. Il s'en treuve, qui pour s'aduançer, ne considerent ny vertu ny vice, & qui ne regardent pas quand ils montent sur de hauts degrez, si c'est par le merite ou par la faueur, par le crime ou par la bassesse. D'autres s'affligent iusques à mourir, pour auoir moins de reputation qu'ils n'en pretendent : pour croire que leur condition n'est iamais bonne, tant que celle de leur voisin est meilleure, ou pour auoir esté deshonnorez par la médifance, avec cette fausse opinion, qu'ils doiuent estre leurs ennemis propres, puis qu'elle n'a pas crainct de les entreprendre. Il n'y a pas moins de ces déreglemens dans le monde, qu'il s'y treuvent d'hommes, à qui la

prosperité fait quelque grace ; & Pon ne s'en éloigne iamais , qu'à force de se persuader que toutes les choses d'icy-bas sont vaines & passageres ; que la pluspart n'ont seruy qu'à faire des superbes & des ridicules ; & qu'elles ne composent ny les gens de bien , ny les Sages. Crates n'eust point ietté ses richesses dans la mer , s'il eust creu pouuoir viure heureux avec elles : il n'eust pas esté Sage , s'il n'en eust connu l'effet ; ny Philosophe , si dans le repos qu'il cherchoit , il n'eust cōnu le plus court chemin pour y paruenir. Nostre Isle peut fournir iusques à neuf Roys couronnez , lors qu'elle estoit retenuë par les vieux Saxons , qui pour chercher dans vne basse condition , la tranquillité qu'ils n'auoient pû treuuer dans vne plus haute & plus eminente , ont fait dans ce mesme sentiment , vne chaire de leur throsne , & qui ont changé

leurs Sceptres en Liures. J'entends d'un costé les plus chers & les plus anciens Apostres qui disent : *Nous n'avons point d'or ny d'argent: & l'Ennemy Spirituel, d'un autre: Je te donneray tous les Royannes du monde avec leur gloire, pource que ie dispose de toutes ces choses.* De sorte qu'il est maintenant aisé de prendre dans ces deux conditions, ou celle des Saints, ou celle du Diable. Celuy-là estoit donc plus ménager que Philosophe, qui prit les richesses pour des biens: & cét autre rencontra mieux, qui les appella des biens de fortune, pour monstrier qu'ils estoient aussi faux, que celle dont il leur faisoit tirer le nom, ou peut-estre pour nous apprendre, que c'est par hazard quand elles deuiennent bonnes. Apres tout, on ne peut pas croire qu'elles puissent estre proprement des biens, puis qu'elles nuisent à tous ceux qui les possèdent, qu'elles leur font

treuver la pauvreté dans leur abondance, qu'elles n'adioustant rien à nostre bonté, qu'elles s'en vont dans vne nuit, qu'elles manquent aux plus gens de bien, & qu'elles assouviennent des sacrileges & des parricides. Nous en pouuons dire ce qu'on a dit autresfois du feu & de l'eau, qui sont de bons seruiteurs ; mais de mauuais maistres. Quand vous en faites vos esclaves, elles vous sont profitables dans leur usage, si elles ne le sont dans leur nature ; & sont vtils aux autres par vostre moyen : Mais si elles vous gouvernent, vous vous enchaînez dans vostre galere, & vous ne songez pas qu'un vassal se mesle rarement de commander, sans passer à la tyrannie. C'est vouloir vivre sans liberté, sans raison, & sans plaisir : & quoy que nos chaînes soient d'or, ou que comme Helio-gabale, nous ayons fait provision de cordons de soye, nostre seruitude

pour estre plus éclattante, n'en peut estre, ny plus heureuse, ny plus aisée.

C H A P I T R E XIX.

L'H O N N E U R vaut peut-estre mieux, & c'est l'opinion des ignorans, qui ne iugent de toutes les choses de dehors, que par la couleur & par l'apparence. Ceux dont les lumieres sont plus hautes & plus viues, ont vn sentiment bien contraire, & ne treuuent point de raison qui les persuade, qu'il y ait de l'aduantage & de la gloire, à sortir simplement d'une ancienne race. Je ferois d'accord avec les premiers, si la Noblesse apportoit au monde la pluspart des belles qualitez avec elle, & si la Nature estoit obligée par quelque lien estroit, de produire dès enfans qui ressemblassent à leurs peres. Elle va d'un mesme

cours, & tient le mesme ordre chez les brutes : Vn pigeon ne sort point de l'aire d'un Aigle ; & quoy qu'on ait dit, que la Brebis de Nicippus ait fait un Lion, il est certain que c'est une erreur ou un prodige. Cependant, l'homme qui tient son estre du Ciel, se rencontre dans une disposition toute differente, quoy que le visage & les traits en soient semblables : Ce qu'il a de terre, suit la ressemblance ; mais la generosité, la sagesse, & toutes les autres vertus, tirent d'ailleurs leur éclat & leur origine. C'est une idolatrie qui se renouvelle, quand on se prosterne devant un veau d'or ; comme c'est une folie extraordinaire, de condamner un homme, qui ne peut monstrier de ses ancestres, qu'une carte blanche. Si Cesar ou Agathocles n'ont qu'un potier pour leur pere, faut-il que leur merite soit estouffé dans la bassesse de leur

naissance ? & que Bion soit vn objet de mépris & derisée, pour estre fils d'une Courtisane ? Il faut estre mauvais Grammairien, pour appeller bon, ce qui arriue aux plus vicieux ; ou si le plus haut poinct d'honneur est dans le sang & dans la race, il faut encore que la Grandeur ait quelques Archiues, qui rendent la succession priuilegiée de ce tiltre de vertu. Quelque exacte recherche qu'on puisse faire, on verra qu'il n'est que dans l'opinion d'autrui, & principalement du vulgaire, ie veux dire, de cette beste à plusieurs têtes, qui sont différentes comme ses langues, & qui ne s'accordent iamais ensemble, ny entr'elles-mesmes. Pour iuger sainement de l'inconstance de la populace, ne considerez que les Lystriens, que la seule violence empesche de sacrifier à Paul & à Barnabas, les bœufs qu'ils amenoient couronnez de fleurs à

l'Autel de Iupiter & de Mercure; & qui courans aussi-tost apres pour les lapider, font des criminels de ces Apostres, dont ils auoient fait des Dieux, & ne les regardent que comme les victimes du sacrifice qu'ils s'estoient efforcez de leur offrir. Le vray honneur se treuue où la race & la vertu se treuuent ensemble; & c'est en vain que les Grands se resioüyffent de la renommée de leurs ayeux, s'ils ne s'efforcent de s'en rendre dignes, s'ils ne font leurs imitateurs aussi-bien que leurs heritiers, & s'ils ne sont pas plus ialoux d'une veritable gloire, que d'une fausse louange. La race peut estre suiette à cent defauts, elle peut auoir ses imperfections naturelles, & son éclat peut changer avec l'opinion du peuple: Mais la vertu seule est tousiours semblable à soy. mesme, & ses plus opiniastres ennemis ne laissent pas d'auoir du respect

pour elle. Si la Noblesse n'en est point accompagnée, elle n'est que comme l'objet du vice, qui attire de plus loin les yeux des hommes qui osent bien la mépriser, quoy qu'ils ne soient pas assez libres pour la reprendre. A mesure que le corps s'abaisse pour l'honorer, l'esprit l'abhorre: Il se repent de sa deference, auparavant même qu'il la luy ait renduë, & compare enfin celuy qu'il voit avec tant de sousmission, à quelque Tragedie de Seneque, dorée curieusement au dehors; qui n'est peut-estre qu'un Thyeste, c'est à dire, le tombeau de ses enfans propres, qu'un Oedippe mary de sa propre mere, ou quelque autre monstre qu'on ne sçauroit voir, sans le detester.

CHAPITRE XX.

ON ne doit pas s'imaginer seulement, que ces choses de dehors soient bonnes de leur nature, il faut croire encore, qu'elles font aujourdhuy la pluspart des affligez & des miserables. Outre que Dieu nous punit de l'excès d'amour, que nous auons ordinairement pour elles, & qu'il nous fait voir, que c'est pour luy que nous en deuons auoir au dernier degré, il nous les oste, quoy que nous fassions; de sorte qu'il n'est point de moyen plus assuré de les perdre, que de les aimer. Celuy qui se promeine dans vn chemin plat & vny, ne tombe, ou ne peut au moins tomber que de sa hauteur, sans se faire mal: mais celuy qui monte dans quelque lieu élevé, se treuve tousiours en danger, & ne fait jamais de cheute, qu'il ne

s'écrase & qu'il ne se tuë. Comme les voiles hautes donnent plus de prise à la tempeste, & que le Pilote les rabat, pour éviter la violence des flots qui se crévent par ce moyen, contre son vaisseau; nostre condition n'est aussi iamais plus suiette aux malheurs qui nous menacēt, que quand elle est eminente; & nous y sommes d'autant plus sensibles, que nostre playe est plus profonde & plus dangereuse. Si la maison du pauvre Codrus s'embrase, il a le plaisir de se chauffer du moins, à son feu, & se console luy-mesme, de pouvoir reparer sa perte avec vn peu de bois, de terre & de paille. Mais quand celle du riche s'enflamme, & qu'il ne se fait qu'un brasier de diuers estages, il plaint tantost sa garde-robe & tantost ses cabinets; tantost ses tableaux, & tantost ses tapisseries; & perd la raison, à mesure qu'il perd le bastiment & les meubles.

C H A P I T R E X X I.

MAis s'il y a quelque enchantement au monde, c'est le plaisir qui nous charme avec tant de force, & qui trouble nostre repos avec tant d'agrément, que nous faisons d'ordinaire nostre bien de cét embarras & de ce desordre. La volupté change les hommes en bestes, par vne metamorphose inuisible; & de quelques yeux qu'ils regardent la raison qui les doit conduire, ils se consacrent plus d'amour pour vn estat si honteux, que pour leur condition premiere. Ils soustiennent que ce trouble est bon, puis qu'il leur plaist & qu'il les contente, & qu'on ne doit point craindre l'ennemy qui remplit le ventre & la bourse. Comme ils n'examinent ce contentement que par l'apparence, ce n'est pas vn miracle que

leur auement fassé leur erreur, puis qu'en eux la partie la plus haute est soumise à la plus basse, que la raison est gouvernée par le sens, & que cette Reyne est deuenue la sujette de ses esclaves. Si le plaisir n'a eu pour eux des amorces toutes nouvelles, & s'il ne leur a plus donné qu'il ne peut auoir, leur ioye a tousiours esté trauersée par quelque tristesse impreueüe, par quelque incident fascheux, ou par le remords de la conscience. La plus belle de toutes les fleurs a ses épines, & ce n'est pas sans difficulté qu'on peut resoudre, si elle est plus agreable par son odeur, que cuisante par ses picqueures. On ne doit chercher la felicité parfaite que dans le Ciel; & si elle se pouuoit treuuer sur la terre, ce Ciel mesme, pour qui l'on ne scauroit faire assez de souhaits, deuiendroit l'obiet de nostre auersion & de nostre crainte. Dieu veut que

nos plaisirs soient reglez aussi-bien que nous, & qu'ils portent par tout avec eux, ie ne sçay quoy de perissable. Considérez ce grand Roy, dont la Sagesse & les tresors remplirent d'admiration tout son peuple, & les Nations les plus éloignées; vous verrez qu'il est venu à bout de son industrie dans la recherche du bonheur du monde, qu'il a tout accordé à son cœur & à ses yeux, qu'il pouuoit auoir tout ce qu'il pouuoit connoistre, & qu'il ne s'écrie pas simplement, que tout n'est que vanité sur la terre, mais encore tourment d'esprit. Si quelqu'un est plus subtil & plus ingenieux que luy, qu'il cherche dans les Cedres du Liban, ou dans l'hysope des vallées, ce que ce Roy n'a pû treuver par son ignorance ou par sa paresse, & qu'il suiue des sentiers beaucoup plus aisez pour y paruenir: mais s'il vit dans cette esperance ridicule, il ne s'exerce

que pour augmenter sa folie , que pour faire voir qu'il ne connoist rien icy bas , & qu'il ne se connoist pas luy-mesme. Comme il y a de l'imperfection dans nos plaisirs, il s'en treuve aussi dans leur abondance ; & si la continuation en est mauuaise, le succès en est encore plus triste. Regardez-les par leur fin, vous avouerez, qu'un moment est leur durée , que leur douceur est beaucoup moindre que leur amertume, & qu'il ne nous disent iamaïs adieu, sans nous abandonner à la peur , à la tristesse & aux plaintes. Leur entrée, comme celle de Dalila , est toute obligeante & toute ciuile ; mais pour peu que vous les vouliez écouter, ils ne vous laisseront, ny force ny veüe. Ce sont des moucherons de nuict, qui volent quelque temps autour de nous, avec quelque espece d'harmonie ; mais ils picquent tousiours auparauant que de nous

quitter. La volupté n'a point de plus belle fin, que la douleur & le repentir: La peine en est encore plus rude; mais le desespoir est le pire. Si vous évitez ses compagnes, vous avez desia ce qu'il faut pour vous défendre des suivantes. Il est beaucoup plus seur de vivre sans elle, que d'être obligé de mourir en sa compagnie. Ceux qui sont dans vne resolution si iuste, & qui connoissent que l'honneur, les thresors & les plaisirs, sont trompeurs, imparfaits, inconstans & dangereux, en apprennent l'usage sans aucune confiance, & souffrent leur perte sans aucun regret. S'il sont en leur pouvoir, ils éprouvent combien ils leur pesent: & s'ils leur manquent, ils n'en sont pas moins en repos, quoy qu'ils en soient moins en estime parmy les autres. Quand nous auons obtenu ce bien, toutes les conditions nous sont égales: leur

changement ne ſçauroit nous affli-
ger, ny nous corrompre : mais
quand nous le negligons, rien n'eſt
capable de nous aſſouir : & quand
la proſperité meſme ſe donneroit
toute entiere à nous, il ſe treuueroit
encore, que nous aurions plus de
plaintes que de remerciemens, à luy
faire.

C H A P I T R E X X I I .

A Pres auoir découuert les enne-
mis qui nous troublent au de-
dans, il eſt aiſé de ſe defendre de
leurs ruses & de leurs attaques : mais
puis qu'outre cét aduantage, nous
cherchons encore dequoy viure
heureuſement, il faut aller vn peu
plus loin, & paſſer à quelques re-
gles poſitiues, qui peuuent ſeules
nous entretenir dans le repos qu'el-
les nous promettent. Ie ne croy pas
qu'on m'accuſe de ſuperſtition,


quand on sçaura que i'establis le fonds de cette tranquillité dans le Ciel, puis qu'elle n'en peut auoir sur la terre. L'inconstance est vn accident inseparable de toutes les choses du monde; & comme elles ne demeurent iamais dans vn mesme estat, elles s'échappent de nos yeux ou de nos mains, & disparoissent aussi-tost qu'on les a treuues, ou qu'on les a veuës. Pour estre en possession de ce bien solide, il faut le rencontrer en soy-mesme, dans le mépris de ce qui trouble nostre ame, dans la haine de ce qui peut nuire à nostre salut, & pour tout dire, dans l'horreur du vice, & dans la iouïssance de Dieu. L'esprit treuve tousiours quelque refuge, & ressemble à l'Elephant, qui ne peut se reposer, à ce qu'on croit, s'il ne s'appuye sur quelque chose. L'auaricieux, qui n'a que son coffre pour son Ciel, écoute, avec quelque sorte

de regret, les maledictions dont on le traite pour sa tyrannie & pour ses vsures : mais s'il reuient à son logis, & qu'il voye ses thresors asseurez contre les larrons, il se flatte dans sa passion déreglée, & ne treuue point de conseil si beau, que son auarice. Le gourmand, apres la perte de ses amis, se console dans sa bonne chere : La table ne luy permet pas de tourner les yeux du costé de leur cercueil; & de quelque triste nouvelle qu'on l'instruise, il se réjouira plus d'un plat bien assaisonné, qu'il ne s'affligera de la cheute du Soleil, & de la derniere desolation de la Nature. L'écolier seul se contente de ce qu'il sçait : Il marche d'un pied égal entre ce qui donne aux autres, de la ioye ou de la tristesse, & ne fait point aller plus loin ses pretensions, que son estude. On ne manque point de cét azile, quand on se voit attaqué ; autrement


ment dans la poursuite, le mesme mal-heur nous arriue qu'à Sisera, à qui de Iahels ne refuseront, ny le couuert, ny du laiët à boire; & qui apres cette courtoisie, luy planteront vn clou dans la teste, pour estre en plus grande seureté. La raison en est sensible, & l'experience nous fait voir, que nous tombons d'ordinaire avec ce qui a accoustumé de nous appuyer, que la ioye des auaricieux s'évanouïyt avec leurs richesses, & que le gourmand s'abandonne au desespoir, quand sa bourse ne luy permet plus de remplir son ventre. Si le mal monte seulement vn degré plus haut, & s'ils sont pressez de la maladie ou de la mort, ils méprisent les thresors & la bonne chere, ou bien, ils ne s'en ressouuiennent qu'avec vn regret qui les tuë. Dans cét estat, toutes les consolations qu'ils se propoioient, les abandonnent au milieu de leur ruine, & s'en

éloignent, comme les rats de quelque maison qui brusle ; cependant que d'autres y demeurent fermes, pour auoir cherché leurs plaisirs ailleurs, & pour s'estre éleuez au dessus de toutes les reuolutions humaines. Cette pensée est le principe de nostre repos & de nostre ioye : C'est par elle, que les conditions les plus differentes nous sont égales, & que nous prenons le bien & le mal d'une mesme main. Le Chrestien est libre par cette maxime, dans le lieu le plus profond & le plus obscur : il en perce toutes les tenebres, & ne vit pas d'un autre air dās vn cachot, que dans sa maison. Il est asseuré que le monde n'a qu'un Soleil, dont vn simple nuage luy peut dérober la veüe ; mais que celuy aupres de qui les estoiles les plus éclattantes, ne sont que comme le mouchon d'une chandelle, penetre l'obscurité de sa demeure, que les Anges luy

tiennent tousiours compagnie; & dans cét estat il fait son Paradis de la prison qu'on luy auoit donnée pour son tourment, & pour son Enfer. Les plus fortes murailles ne sçauroient defendre l'entrée à celuy qui remplit tout: Il n'est point de tenebres qui puissent demeurer avec le Dieu de lumiere, ny d'affliction où ce Consolateur se rencontre. Puis qu'il est par tout, ie le trouueray, en quelqu'endroit qu'on me chasse. Les mers n'ont point de barriere entre luy & moy, & ie ne doy point craindre d'exil, que quand on pourra m'arracher aussi bien de la presence de Dieu, que de ma patrie. Mais sa puissance ne peut estre bornée par aucun espace: Son Soleil m'éclaire, la terre ou la mer me porte, & son entretien me réjouïyt & me console en quelque lieu que ie puisse aller. Il m'est luy seul vn monde d'amis & de compagnies:



outre qu'on ne change point de demeure, quand on ne change point d'hoste. Ce n'est pas animer le Ciel, que se former de vains regrets, pour vne maison ou pour vn parent, & ce n'est pas connoistre celuy qui peut tout, que de se plaindre de quelque chose. Si ie suis méprisé du monde, il me suffit d'estre aymé de Dieu, puis que ie ne sçaurois l'estre des deux ensemble. Le monde me caresseroit dauantage, si i'estois moins caressé de mon Sauueur; & quoy qu'il fasse, il ne me sçauroit iamais tant hayr, que Dieu le deteste. Il ne m'importe donc pas d'estre hay de ceux qui sont les objets de la haine de Dieu; & celuy qui ne se contente pas de ce bonheur, n'en merite, ny la continuation, ny la iouïssance. Il nous est aisé de rire de ceux qui se moquent de nous, & d'en auoir mesme pitié, lors qu'ils nous méprisent. Si ie de-



uiens pauvre par quelque accident, ou par quelque perte, ie connois par là, que ce qui est de soy perissable, ne pouuoit estre parfaitement bon, & que toutes mes richesses me sont restées, quoy que i'aye perdu iusques à la chemise. Si c'est estre riche que de posseder quelque chose, on doit bien l'estre d'auantage, quand on possède son Dieu, à qui toutes choses appartiennent. Lors que ie suis foible par quelque indisposition, qui me vient du hazard ou de la Nature, ie la souffre sans murmurer, & ma plainte seroit vn blaspheme, lors que i'ay mon Createur pour mon Medecin. Mon ame est saine, & ne peut estre affoiblie, puis que Dieu est son appuy & sa force. Il y a des malades, à qui la douleur n'arrache pas mesme vn soupir. Ie consens bien qu'on me saigne du bras ou du pied, pour me guerir le cœur ou la teste; mais ie suis beau-

coup plus aise , de voir que mes principales parties soient conseruées , que ie ne suis triste de l'incommodité que me causent les inferieures, Pourueu que Dieu m'ayme, ie trouueray ma liberté dans mon cachot, ma maison dans mon exil, ma gloire dans le mépris, mes richesses dans mes pertes, ma santé dans la maladie, la vie dans la mort, & ma felicité dans toutes ces choses. Si la parfaite iouïssance que nous auons de Dieu, est nostre vray Ciel, l'entretien que nous auons commencé icy bas avec luy, ne peut estre nostre Paradis, qu'en quelque forte, comme vne entrée seulement dans l'autre, qui ne differe pas dans l'espece, si ie ne me trompe; mais dans les degrez de perfection. Si nous voulons faire durer ce bonheur, il faut renoueller cette amitié par des conferences particulieres, par vne conuersation continuée,

& par vne haine irreconciliable pour tout ce qui peut nous en separer, ou nous en distraire. Ce n'est pas estre agreable amy, qu'estre tousiours dans la solitude: Dieu ne se plaist point dans nostre silence; & la bouche ne sçauroit estre muette, cù le cœur est remply d'amour. Toute nostre conuersation dépend de nos demandes & de nos remerciemens: Par ces deux choses nous conuersons avec Dieu, & nous treuons qu'il n'est rien de si precieux, que ce priuilege. Par elles nous luy faisons voir nos plus opiniastres ennemis, nos plus grands defauts, & nos plus secrets déplaisirs: Nous luy decouurons nos souhaits & nos pensées, & nous ne le contentons iamais plus, que quand nous luy demandons beaucoup, & que nous nous plaignons encore dauantage. L'ame s'éleue par ce moyen iusques au throsne de la gloire: Elle n'entend

point qu'on luy presente vn Sceptre pour vne marque de sa grandeur : elle sçait qu'il n'est point de moment trop tard, ny de personne trop basse, ny de crime trop enorme, ny d'impatience trop importune. Nous nous produisons avec liberté, on nous écoute avec ioye, on nous répond sans refus, on nous console avec recompense. Dieu parle quelquesfois à nous par son esprit qu'il nous donne, ou par sa parole qu'il nous fait entendre : Nous l'adorons, & nous le reconnoissons par nos actions de graces, par nostre admiration, & par nos louanges. C'est ainsi que nous communiquons avec luy, qu'il communique avec nous, & que la sainteté deuiant tellement nostre habitude, que pour estre parfaitement glorifiez, il ne reste plus à l'ame qu'à sortir du corps, comme d'une prison fascheuse, & d'un obstacle à sa derniere liberté.

C H A P I T R E X X I I I.

NOs resolutions inferieures, qui sont comme necessaires à nostre paix, viennent de ce premier fondement, comme autant de riuieres d'une mesme mer, ou comme autant d'effets d'un mesme principe. Pour nos actions, il faut que nostre ame s'abstienne par un vœu secret, de tout ce qui pourroit estre iniurieux à la Majesté de Dieu, sur qui nous deuons nous appuyer, & qu'elle luy obeyssé sans affectation & sans contrainte, quand elle auroit contr'elle, ce qu'il y a de forces & d'obstacles dans la Nature. Ce ferme dessein ne doit estre, ny deuancé ny suiuy d'une confiance extraordinaire: Nous sommes trop foibles & trop impuissans, pour porter de nous-mesmes, les choses à quelque perfection acheuée, & nous deuons

repeter ce qui nous a esté dit : *Seigneur, donne ce que tu demandes, & commande ce que tu voudras.* C'est ce qui fortifia Moysé dans la hardiesse qu'il eut, de prendre ce serpent terrible : c'est ce qui fit que saint Pierre marcha sur la mer, avec autant de facilité, que s'il eust esté au milieu d'une campagne : & c'est ce qui en a rendu d'autres si fermes dans les dangers & dans les tourmens, qu'ils semblent n'estre venus que pour mettre la tyrannie au dessous de leur courage. Comme nous auons presté ces deux sermens solennels, par l'entremise d'autrui, nous deuons les renoueller le plus souuent qu'il nous est possible, & faire voir que nous connoissons trop bien ce fidele amy, pour n'estre pas tousiours dans le soin de le conseruer, & dans la crainte de luy déplaire. C'est par cette raison que nous allons au deuant de tout ce qui nous peut causer

quelque ennuy, & que nous luy faisons vn double vœu de fidelité & d'obeyſſance. Nous nous entretenons ainſi dans noſtre deuoir : nous n'y manquons, ny par l'attente, ny par la peur, & le monde ne ſçauroit nous en diuertir, quelque bien qu'il nous vueille faire gagner, ou nous faire perdre. Celuy qui ſe partage également entre la conſcience & la volupté, n'eſt pas encore capable de ce repos : Son traité ne luy permet pas de iouiſſer d'un ſi grand bon-heur; & quelque effort que l'une ou l'autre puiſſe faire pour obtenir l'honneur du combat, il eſt toujours troublé dans la reſiſtance & dans la victoire. Rebecca meritoit qu'on la plaigniſt, quand les iumeaux ſe battoient dedans ſon ventre : Si Iacob y eut eſté ſeul, elle euſt, ſans doute, beaucoup moins ſouffert; & ſa ſterilité ne luy pouuoit eſtre ſi faſcheuſe, que la guerre qu'elle entretenoit.

dans ses entrailles. Le plaisir occupe la place pour quelque temps; la conscience luy donne l'assaut, & l'emporte souuent de viue force : Mais le plaisir la reprend bien-tost apres, ou par le mauuais ordre qu'on y tient, ou par les gardes qu'elle a coustume de corrompre; de sorte que l'un des deux partis est tousiours dans les attaques, & l'autre dans la resistance. L'ame suspenduë entre ces mortels ennemis, est sans consolation & sans repos, & n'en rencontre iamais, que quand elle a banny le plaisir; qu'elle permet que la conscience triomphe d'elle, comme d'un bien qui luy est propre, & qu'elle en fait sa maistresse & sa gouuernante. L'experience nous enseigne ce que vaut cette pensée : *J'ay bien fait*; elle nous peut suffire au mépris de toutes les delices du monde. Il y a de l'iniure a dire. que le Christianisme fait les melancoliques & les stupides : au contrai-

re, c'est pour estre moins Chrestiens que nous ne deurions estre, que nous sommes tous assoupis. Nous auons autant de pieté qu'il nous en faut pour negliger la volupté; mais nous n'en auons pas assez pour la surmonter. Celuy-là peut tout, qui se peut vaincre: & l'homme ne peut estre remply de ioye, que quand il est remply de l'esprit de Dieu. C'est icy que le Philosophe doit apprendre du fidele: Les autres peuuent bien décrire la felicité, ou pour en auoir entendu parler, ou pour se l'estre représentée; mais il n'y a que celuy-cy qui la ressent, & qui renonce à toutes les choses du monde, pour s'en rendre digne.

C H A P I T R E X X I V .

PAR cette resolution, on ne doit pas simplement bannir les actions qui sont mauuaises d'elles-

mesmes; mais encore les suspectes & les curieuses. Il faut en cecy, que nostre iugement soit nostre guide, puis que la tranquillité de l'esprit n'est autre chose que son assurance. Autrement, il ne cesse de flotter, quand il est irresolu: Ce qui le conduit, l'embarrasse, & l'on ne doit pas croire, qu'il soit dans le chemin qu'il doit suiure, comme on ne peut pas dire, qu'un vaisseau fasse sa route, quand il est agité de la tempeste. Je voy, par exemple, que l'vsure qui estoit condamnée anciennement comme un larrecin, passe aujourdhuy pour un trafic & pour un mestier honneste; que quelques-uns la pratiquent, & que d'autres l'autorisent. Il est honteux de voir que les hommes courent apres une occupation si basse, & qu'une si mauuaise cause treuve des Aduocats qui la soustiennent. Mes meilleurs amis, ou pour mieux dire, les plus

ménagers, qui sçauent que mon patrimoine est dans mes coffres, me persuadent de l'entirer, & de le faire valoir : L'écoute leur conseil & mon profit ; & pour augmenter mon reuenu, il ne m'en couste qu'un peu de parchemin, de temps & de cire. Ma condition appreuue plus ce procédé, que ma conscience, qui me reproche que ce commerce est trop aisé, pour estre beau. Cependant, ie me laisse aller à mon premier sentiment, avec quelque sorte de repugnance : & dans cet estat, mon scrupule m'oste la meilleure partie de ma ioye, qui m'est rendue bien-tost apres, par le gain qui m'endurcit contre la mesme crainte que i'ay, de traiter avec iniustice. Je voudrois bien estre riche, sans rien faire, & charitable, sans faire iniure : & comme ce desir ne m'accorde aucun repos, il se treuve que ie me prepare des embusches, & que ie suis engagé.

dans mes filets, plus avant que tous les autres. Enfin, pour estre iuste, & pour auoir la paix avec moy-mesme, i'en remets la decision à ma conscience. Le gain informe ce Iuge secret, de distinctions toutes nouuelles; il luy rapporte des exemples & des coustumes en faueur de l'intérêt, & luy remonstre que la charité peut s'accorder avec l'vsure, puis que les deux parties en tirent visiblement de si puissans auantages. La Iustice preuue d'un autre costé, que l'vsure la plus necessaire en apparence, est en effet la plus dangereuse, qu'insensiblement elle fait tort au bien public, qu'elle est la ruine du particulier; & qu'on la peut mettre au nombre des crimes. Ce foible Iuge se rend à ces raisons, sans se declarer pour quelqu'une; & comme il ne veut point hazarder d'arrest, il me renuoye avec mes défiances & mes doutes. Dans cét estat, ie sus-

pens pour quelque temps mon commerce, puis que ie ne suis pas assuré qu'il soit honneste : Le gain me sollicite ailleurs, autant, pour le moins, que la Iustice, & dans ce balancement, ie sens cette inquietude secrette, dont ie ne puis estre deliuré, qu'apres auoir banny ce Marchand du Temple. Cette seuerité nous apporte le repos, que nous esperions inutilement de la solitude, & des compagnies. L'incertitude est vne peine extraordinaire dans les actions, mesme les plus supportables ; & ie ne sçay s'il n'est point aussi dangereux, de faire vn bien avec doute, qu'vn mal avec hardiesse. En effet, ce qui est bon de sa nature, est rendu mauuais par mon scrupule, & ce qui est mauuais de foy, n'est pas tel en cecy que ie le treuve. Mon iugement se fait tort, quand il ne suit pas la verité, & ie n'en fais à personne, quand ie suy

mon opinion. Si la sagesse eternelle eust donné le soin de nostre conduite à nos coniectures, il y eust eu moins de danger d'estre sceptique, de ne point iuger du tout, ou de faillir en iugeant : mais puis que nous deuons deliberer sur des principes plus parfaits, cette incertitude, qui ne peut estre nostre regle, ne peut estre aussi nostre excuse. Il n'est donc point de repos, qu'où les actions sont fondées sur le iugement, & le iugement sur la verité.

CHAPITRE XXV.

CEux qui veulent arriuer à ce point, doiuent absolument se reposer sur la Prouidence de Dieu, pource que les autres qui s'apuyent sur ces choses de dehors, qui nous resioüissent quand elles viennent, & qui nous desesperent quand elles s'en vont, ne sont pas plus asseurez

de leur repos , que de leur inquietude, & qu'ils sont comme vn vaisseau mal équipé, dans la tempeste, qu'une vague fait tantost monter & tantost descendre. Mais c'est auoir treuue desia son repos , que de s'en remettre au decret inéuitable de Dieu, qui ne peut estre changé, ny par aucun accident, ny par aucune pensée. Celui qui eleue sa tranquillité au dessus de toutes les choses mortelles, ne la treuve iamais à dire, ny dans le calme , ny dans la tourmente, & n'en perdrait pas la moindre partie, quand le monde se renuerseroit, & que le premier chaos confondroit toute la Nature. Le commencement en est plus difficile , que la suite. Si Dieu, sans prendren conseil, vous a formé dans les entrailles de vostre mere , il peut bien vous tirer, sans aucun secours, des entrailles de la terre. S'il ne manque point de Sagesse. pour gouverner tous les

Cieux, pour former toutes sortes de creatures, il en peut bien auoir assez, pour vous regler & pour vous conduire. Vous dites que vous auez des amis, ou des richesses au moins pour en acquerir, & de la prudence pour les ménager. C'est estre bien credule, que de confier aux autres, ce qu'on se peut confier soy-mesme. Il n'est point d'esprit plus troublé, que celuy du riche: Il n'est point de Sage, qui ne se trompe dans son opinion, & qui ne soit insensé quelquesfois dans celle d'autrui. Les amis peuuent estre dissimulez: les richesses ont accoustumé de nous abuser, ou de nous corrompre; & nostre folie vient bien souuent de nostre prudence, Il faut s'asseurer sur ce qui ne nous peut manquer au besoin, contre nostre volonté mesme: Ce n'est pas elle qui regle le cours des choses, & c'est auoir perdu la raison, que de penser l'interrom-

pre par nos desirs ou par nos craintes. Le passager sans experience, qui voit que le nauire ne va pas bien, ou qu'il va trop loing, prend le mast ou quelqu'autre piece, pour l'arrester; cependant que le Pilote rit dans l'ame de cette sottise, & qu'il sçait bien qu'il faut que le vaisseau aille où le poussent les flots & les voiles. Apres auoir embarqué vos marchandises, vous faites des vœux pour le vent qui vous doit sortir, vous en demandez vn autre qui vous fasse entrer au port, & quand vous auez vuidé vostre barque, & que vous l'auiez remplie, vous estes impatient pour vn troisieme, comme si le Ciel & l'eau n'auoient esté faits, que pour vous seruir, au delà mesme de vos esperances. C'est estre aussi ridicule, que de vouloir preuenir le mal, & de n'auoir de curiosité sous ce pretexte, que pour consulter iusques aux Diables & aux estoilles.

Que sert-il d'aller au deuant de l'heure quand elle est venue, & d'y resister quand elle sonne? C'est en vain s'enquerir de ce qu'on ne peut empêcher. Ce que Dieu a ordonné, est comme fait dans le Ciel, il faut qu'il s'acheue sur la terre. Par cette sorte d'attente, nous hastons les maux qui sont lents de leur nature; & quoy que nous ne puissions les aduançer dans leur yssuë, nous les aduançons pourtant dans nostre opinion. Ceux qui s'opposent à cette Prouidence eternelle, ressemblent proprement à ceux qui nagent contre le courant de l'eau: Ils sont tournez de chaque vague, comme on voit qu'un Marsoin est renuersé de la tourmente; & quoy qu'ils fassent, ils ne trauaillent que pour se perdre avec plus d'adresse.

C H A P I T R E X X V I .

IL faut que l'esprit de l'homme qui est troublé, soit tellement soumis aux résolutions dont nous venons de parler, qu'il se persuade que sa condition est la meilleure de toutes, ou en elle-mesme, ou pour ce qui la regarde. Cette opinion ne doit pas naistre de son orgueil; mais d'un consentement secret, sans qui l'enuie & l'ambition le tyrannisent, & sans qui mesme il ne s'estimerait pas heureux, quand mesme il se verroit au dessus de toutes les reuolutions du monde. Il n'est pas plus possible de souhaitter quelque chose, & d'en iouyr en mesme temps, que de manger & de dormir tout ensemble. C'est pour cette raison que nos souhaits doiuent estre là bornez, pource qu'estans portez naturellement à nous tourmenter, nous mé-

prisons par vne espece d'ingratitude, ce que nous auons, pour ce qui nous manque. Le meilleur des Patriarches a dit quelquefois: O Dieu! que me donneras-tu, puis que ie n'ay point d'enfans? L'esclau, qui se fait vn souuerain bien de la liberté, croiroit auoir tout gagné, s'il auoit perdu ses chaines. Il ne les a pas plustost brisées, qu'il souhaite des richesses, pour donner vn prix à son affranchissement, & treuve que la pauureté n'est pas moins cruelle que la seruitude. S'il a dequoy s'entretenir avec éclat, il porte ses pensées plus auant, & croit qu'il est honteux d'estre riche, sans estre Noble. Il s'imagine quelque temps après, que la Noblesse est mal-heureuse, tant qu'elle n'est pas indépendante: La sujétion luy fait peur, & pour le contenter, il ne luy faut pas moins qu'une Couronne. C'est peu de commander après, à son opi-

nion,

nion, si son pouuoir est resserré dans quelque petit domaine, & s'il a des voisins plus redoutables que luy. La Monarchie n'acheue pas ses desseins; & s'il y va, comme il y aspire, il ne se fait qu'un petit globe de la mer & de la terre, & se fâche de ce qu'il n'y a pas plus de mondes à conquérir. S'il estoit deuenu le Seigneur de tous les hommes, il voudroit prescrire des regles aux Anges, & s'asseoir iusques sur le throsne de Dieu. Il se persuade d'estre immortel, il se fait éleuer des Temples, il veut que sa statuë soit adorée; & cette gloire luy déplaist encore, pource qu'il ne donne pas des loix dans le Ciel, ou qu'il n'est pas enuoyé pour reformer ce qu'il treuve defectueux dans la Nature. L'ambition des insensez n'a point de limites qui l'arrestent: Leurs souhaits vont iusques dans les espaces imaginaires; & ie ne les mépriserois pas, si c'estoit

F

estre heureux, que de posséder beaucoup : mais il est certain, que c'est tout auoir, que d'estre content, & qu'on le peut estre avec moins de peine dans vne condition basse, que dans vne fortune releuée. Outre qu'il y a de la vanité dans ces desirs, il y a beaucoup de folie. Quoy que vous soyez pauvre, il n'y a point de difference entre vous & vn Potentat, si ce n'est, qu'il se fait seruir, & que vous vous seruez vous-mesme. Il a des pouruoyeurs, des cuisiniers, des Maistres d'hostel, des Secrétaires, & beaucoup d'autres Officiers ; où vous faites seul vos prouisions, vostre cuisine, vostre recepte, vostre dépence & vos écritures. Son appanage est d'une longue estendue, & le vostre est enfermé dans des bornes tres-estroites : mais Briarée, avec ses cinquante mains qui nourrit cinquante ventres, n'a point d'auantage sur vous, qui pour n'auoir

que deux mains n'avez aussi qu'un ventre à nourrir. Il a de la vaisselle d'argent, vous en avez d'estain de même couleur; & quoy qu'elle soit de moindre prix, elle est pourtant d'aussi bon usage. Ses plats sont plus friands, les vôtres ne sont pas moins sains: Il mange des oliues, vous mangez des aulx, & ne hayt pas tant l'odeur de vos saulces, que vous méprisez le goust des siennes. Vous n'avez pas toutes les choses qu'il possède, vous en avez aussi qui luy manquent: vous souhaitez sa bourse, & non pas son bien; il demande vostre santé, sans vous enuier vostre table. Nous serions parfaits, si de toutes les conditions des hommes nous n'en choissions que les plus belles parties; mais il est impossible d'en profiter à les prendre toutes ensemble. La Sagesse de Dieu a si-bien réglé nostre estat, qu'il ne se treuve point d'homme si heureux

absolument, qui ne ressenté quelque inquietude, comme il n'en est point de si miserable, qui ne reçoive quelque consolation & quelque ioye. Les choses ne valent ordinairement, que ce que nous les faisons valoir. Celuy qui a des richesses, & qui n'a personne à qui les laisser, regarde avec ialousie son voisin, qui a des enfans, & qui n'a point d'heritage. Le riche n'auroit rien à desirer; s'il auoit vn successeur; & l'autre en a plus qu'il n'en peut entretenir: Celuy-là croit que tout iroit bien, si le riche pouuoit estre sans ennuy; & le pauvre croit que tout iroit mieux encore, s'il y auoit moins de bouches, & plus à manger. Vn ouurier robuste ne rencontre point de viande, qu'il ne digere, ny de trauail qu'il ne supporte: Cependant il voudroit bien deuenir plus foible, pourueu qu'il deuint plus riche: Celuy qui aura esté élevé avec

beaucoup de tendresse, & qui sera dégousté des morceaux les plus délicats, enuiera l'appetit & l'estomach de son valet, & ne refuseroit pas de changer de condition, pourueu qu'il luy fust permis de changer de corps à la mesme heure. Si Dieu s'accommodoit à nos desirs, il nous accorderoit la santé, la prudence, les richesses, la reputation, l'honneur, la force, la doctrine & la beauté du visage & de la taille. Mais supposez, que Dieu partage si-bien ces dons, qu'il ne les donne iamais tous ensemble, & qu'il vous en offre quelque vn, vous en prendriez infailiblement vn autre, que celuy qu'il vous auroit desia donné. Si vous estiez sçauant, il vous fâcheroit de n'estre pas fort; si vous estiez vigoureux, vous vous plaindriez de n'estre pas riche; si vous estiez riche, vous souhaitteriez d'estre beau; & si vous estiez beau, vous voudriez estre

immortel; comme s'il ne sçauoit pas mieux que vous, ce qui vous est propre. Nous nous rapportons bien souuent de nos affaires à l'experien-
ce d'un Marchand, & nous n'osons nous confier au choix de Dieu, qui ne peut iamais nous tromper, & qui ne sçauroit estre trompé. Vous iugez peut-estre, que cét autre don valoit beaucoup mieux que le der-
^ nier, & peut-estre aussi que vous ne rencontrez pas mal, & qu'il n'est pas si bon pour vous, que pour celuy qui en a la jouïssance. Quoy que la liberté soit la plus agreable de toutes les choses, à ceux qui n'en sçauent pas abuser, les fers ne laissent pas d'estre vtils aux furieux & aux phrenetiques. Le vin, qui est vne excellente nourriture pour ceux qui se portent bien, est vn poison pour tous ceux qui sont en fièvre. Le sommeil entretient vn homme sain; & celuy qui se plaint de quelque apo-

stume , ne peut reposer qu'après qu'elle s'est crevée. Le Bouc mange la ciguë , & le Magot l'araignée , & ces animaux vivent de ce qui en fait mourir plusieurs autres. Dans l'appréciation de ce qui est bon , & de ce qui est mauvais , il y a de la différence du grand au petit , aussi-bien que dans les Diettes. Tous les palais n'ont pas le même goût pour les mêmes viandes , & ce que l'un prend comme délicat , l'autre le laisse comme insipide. Si vous croyez que ce morceau vous soit nécessaire , vostre Medecin connoist celuy qui est le meilleur pour vous , & c'est creuser la fosse avec ses dents , comme dit nostre Prouerbe , que de s'en fier à son appetit avec trop d'opiniastreté. Dieu a plus de soin de vostre salut : Il voit que vous seriez plus superbe , si vous aviez plus de credit ; que vous seriez plus débauché , si vous aviez plus de force ; que

vous seriez plus auare, si vous auiez plus de richesses ; & que vous seriez plus dissolu, si vous auiez plus de santé. Puis que vous n'avez point d'yeux pour l'aduenir, reposez-vous sur celuy qui n'ignore pas ce que vous ferez, & ce que vous voulez estre. Si le Ciel vous plaist, vous ne pouuez pas auoir de guide plus seur, que celuy qui en a fait sa demeure; & s'il vous y conduit par des sentiers difficiles & fascheux, vous deuez iuger, que le chemin le plus rude en est le plus court & le plus battu. Il sçait tout preuoir & tout faire, par vne Sagesse admirable, & par vne Puissance infinie: & ne vous refusera rien de ce qui vous sera le plus vtile, puis que son amour vous a desia rendu de visibles marques de son pouuoir & de sa Sagesse. Dieu ne veut pas les choses, à cause qu'elles sont bonnes, elles sont bonnes seulement pource qu'il les veut:
celle

celle là ne vous seroit pas arriuée, s'il en eust veu quelqu'autre pour vous plus aduantageuse, & vous ne deuez pas l'accuser d'imperfection, quand vostre volonté ne s'accorde pas avec la sienne.

C H A P I T R E X X V I I .

A Pres auoir conduit le Lecteur iusques à la source de son repos, il ne tiendra plus qu'à luy, de faire son propre d'un si grand tresor; & s'il s'en retourne aussi pauvre qu'il y est venu, il ne merite pas, qu'on donne des larmes à sa misere. Il est mal-aisé que les autres ayent pitié de nous, quand nous n'en auons pas de nous-mesmes; & le mal-heur volontaire est indigne de compassion & de remede. Je me suis estonné cent fois de la folie de plusieurs hommes qui ne s'occupent iamais plus serieusement, qu'à se

tourmenter, comme si nous estions condamnés à une inquiétude fatale; & qui ne goûtent pas plus le plaisir, que si le bourreau les traînoit tous-jours au supplice. L'un sué à grosses gouttes sous un faix qui n'est que dans son opinion: L'autre augmente sa douleur avec son impatience, & se fait une large playe d'une simple égratignure. Celui-cy avance un mal douteux par sa crainte, se plaint d'une affliction qu'il n'a pas prévue, ou n'aperçoit pas le bonheur qui l'accompagne: Celui-là se laisse conduire à sa passion, ou soupire dans la solitude; & qui parmi tant d'hommes en trouveroit un content, ne feroit pas moins qu'un miracle. Cette imprudence est une ingratitude honteuse: Nous sommes nos plus mortels ennemis, & c'est se tuer, que de ne pas mieux ménager sa vie. Que nos peines sont inégales, & qu'elles ont peu de

reſſemblance ! Si nous briguons des richesses, nous les ſouhaitrons avec ardeur, nous les cherchons avec ſoin, & nous les ſuiuons avec vne ambition d'eſclau. Il n'eſt pas beſoin qu'on ſollicite noſtre industrie ; le chemin qui nous y conduit, n'eſt point mauuais, quoy que defendu ; & le plus court eſt toujours le plus iuſte & le plus honneſte. Nous les attendons avec d'epit, quand elles ne ſont pas proches de nous ; & s'il arriue qu'on en recompense noſtre merite, ce qui eſt bien rare, nous les receuons comme ſi nous euſſions eſté mal-heureux ſans elles. Cependant, les richesses les plus precieues nous viennent chercher, & nous les receuons avec autant de froideur, que ces pauvres ſolliciteurs, qui par noſtre faueur eſperent de gagner leur cauſe. Les plus indifferens ne nous refuſeroient pas leur aſſiſtance, ſi noſtre diſgrace venoit de noſtre


mal-heur; mais puis que nostre lascheté l'entretient, on ne feroit pas si-bien de nous plaindre de nostre souffrance, que de nous punir de nostre mollesse. C'est estre genereux, & vraiment Chrestien, que de pouuoir nuire à quelqu'un, & d'en mépriser l'occasion; mais dans ce qui regarde nostre bien; de tous les ménages, la paresse en est le plus mauuais & le plus estrange. Vous dites que cette paix est agreable comme elle est vtile, & que vous donneriez tous vos soins à l'obtenir, si les conditions ne vous en sembloient point trop rudes. Vostre lascheté seroit beaucoup plus honteuse, si elle restoit sans pretexte ou sans excuse; mais vous ne dites pas aussi, qu'il n'est point d'obstacle, que vous ne taschiez de renuerfer pour acquerir des richesses, pour posseder vne charge, pour deuenir plus sçauant, ou pour dérober vn

plaisir, qui sera quelquesfois vn crime. Faut-il se laisser mourir de froid & de faim dans vne hutte, pource qu'on n'a point d'habit, de maison, ny de nourriture sans argent, qu'on n'en gaigne que par le trauail, & qu'on ne trauaille point sans peine? Il faut estre bien charitable, pour dire qu'un homme si paresseux est plus digne de l'aumône, que de la verge. La tranquillité ne seroit pas bonne, s'il estoit aussi aisé de l'obtenir, que de l'enuier. Ceux qui craignent de se défaire de leur oisiveté pour cette raison, ne traisnent qu'une vie mal-heureuse & languissante : Ils sont à tous momens dans la confusion & dans les plaintes, & se bastissent icy-bas vn Enfer particulier, iusques à ce que la mort les conduise dans vn autre. Quelle folie, d'auoir si peu de soin d'un bien, pour qui tous les autres sont à desirer, apres en auoir tant

pris pour des choses basses, apres auoir affoibly nos corps pour elles par vn trauail de longue haleine, apres auoir mesme souhaitté que la mort ne nous y vinst pas surprendre, pour leur donner avec plus de loisir, ce qui nous reste de forces ! Bannissons cette negligence dangereuse & desesperée, & réueillons-nous de cét assoupissement, si nous n'auons iuré de nous perdre, & si nous n'auons plus de passion pour vn bien faux, que pour vn solide. Quand nous l'aurons obtenu, nous verrons sous nos pieds toutes sortes de malheurs : Nous rirons de ces orages, & de ces tempestes qui s'éleuent au milieu de nostre cœur, & nous regarderons d'un visage gay, le Ciel & le monde, pour nous commander dans l'un, & pour aspirer à l'autre. Il est plus facile de conceuoir nostre satisfaction, que de l'exprimer, quand nostre ame sera partagée en

tre l'excès de la tristesse & de la joye, que le fondement de celle-cy fera nos plaisirs de nos plus funestes aduëntures, & que la mort nous conduira de ce Paradis à l'autre, & de la tranquillité de l'ame, à vne vie éternelle. Fuyez d'icy, vous qui n'avez des yeux que pour vos Palais superbes, pour vos riches gardero-bes, pour vos coffres remplis de terre iaune & blanche, & pour la souf-mission que vous rendent ceux qui sont deuenus vos esclaués par la bassesse de leur esprit, ou par le malheur de leur naissance. Goustez à loisir ce que la chasse & les iardins ont de plus doux & de plus charmant; ne faites vos inclinations que du bal & de la musique, entretenez vostre tranquillité de ce que la Nature a de plus curieux & de plus rare, & n'attendez pas que ie vous enuie vne paix qui vaut moins que la plus cruelle guerre.

F I N.



18
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76
77
78
79
80
81
82
83
84
85
86
87
88
89
90
91
92
93
94
95
96
97
98
99
100











